

Atham woIuanna Lon iloporot loKapik ammakka oIuanna pokurrot **Iuanna**

OIuanna pokat nti iul woIeccuo iattul ana ikken ke'ra. Kwokurrot atham enni akwittarot ul woIouth ana opilingon akin occokot lon loIeccuo. Kwerethe lon loppot ilommaththik ila oIeccuo pokkothe, ana thongkene itha kwongkenet. Elli lakene itti oIeccuo pokat pul iponyi ana kwokat Kapik cakuruk.

Atham wuroko ncik nthokene lon itti oIeccuo pokat lon loKapik, ana manna thothirot thon nocapu ncik appik. Ana itti thio thung thaka papu pothokiot ngüccük cik ipaneko lon ilokithak, lonocapu ncik appik. Ana itti ook oMiccie ipa thao thung therettathe inthatham noma'rot.

OIuanna peret thongat thoIeccuo itha kwon-gothe ul iammakothok kicce ana lon lung ilapiet kin cik cipin akkwarthuk occokittat (Ku'rathal 13-17). Atham wacothok lon ntheret kathar ika oIeccuo pakkmakot ngngin ana okkwettat nothapak. Ana tat akka kurokot nti ithio ana akka kumminthet ul iammakothok ma'ri moppot.

*OMiccie lon lothupuththuput loKapik
lothakkat pul iponyi*

¹ Ncinomun pap'rek pellat cik, lon lokat cik ana lon lokat cik noKapik. ² Ana ncinomun kwokat cik okin oKapik.

³ Ana Kapik kokkathe a'rupu appik nti ikkun wolon len ana papella ipokat cik pokkattathe aukun wolon len wakonnokkot. ⁴ Thikkoik thaat nnolon ana thikkoik then ithen akkanane ul k'ran ikimmiekin cik appik. ⁵ K'ran kaccieik i'rïmak, ana ngi'rïmak ngannalkot k'ran ken.

⁶ Pul p'rek pakkakathe ipa Kapik kothiothe ponat k'ran itti oIuanna. ⁷ Kwaat itti akwatherene ul lon lok'ran ken ikainet ul, othakka itti aul appik occokot lon nomikït nti ilon loIuanna. ⁸ Ook ngka kung pakannoka k'ran ikacco, kwaat itti akwatherene ul lon lopul ipethekkin k'ran ikacco. ⁹ K'ran ikacco ikaik icat ikacciene ul cik appik kokat cik akao nocapu.

¹⁰ Lon lokat cik nocapu antoka manna itti capu ncik appik cokkattathe nti ikkun wung anaruk capu commarok. ¹¹ Kwainet pothok ipokat pung anaruk ul wung wakinnikkiek cik. ¹² Anaruk okkwion ithikkierok cik ana ithoccokothe lon lok'ran kung nomikït, kwokorronnathekin akin othakka nyukul nyoKapik, ¹³ nyukul inya akorronno okwonta nti iul ionyi ana akka ul ionyi wongothe itti okin thakwonta anaruk okin thokwontat noKapik.

¹⁴ Lon lothakkakathe ka kopul iponyi akikkat cik iaron. Oron thimmat thrïk thung, thrïk thung pulluk pen okkwi ipaat naththan, nthoporot thoppot ana lon ilaik icat.

¹⁵ OIuanna poco'rothok ntherethok llon ilaik icat akwi're mpo're cittan itti, "Ook empi ipa mpi'ret lon len itti, 'Okkwi ipamakothein priik naun akka kwokat cik tokït naun.'" ¹⁶ Ana nti ithoporot thung ithoppot, kwethietheron cik

arttot noma'ri moppot. ¹⁷ Akka lon lothonce'ret lon cik loKapik lakkethet ton nti ikkun woMucca ana thoporot ana lon ilaik icat laIeccuo oMiccie akkonat. ¹⁸ Pul pella pimmat Kapik kirrkkir. Anaruk ukul wung wulluk, iammakka Kapik icat ana iaik iccik kung, ien akkiniet ton Kapik.

Lon loIuanna pomamuthie

(Maththa 3.1-12; Markkoc 1.2-8; Lukka 3.15-17)

¹⁹ Lon elli ila Iuanna pomamuthie peret ngka kung akka ul ittittik woIouth wonoka'ran koU-ruccelim wothiothe ul wonoppa toKapik ana ul woLauai akin othipittothok itti ook okkwen.

²⁰ Kwakonnocukkwat nolon anaruk kwi'ret ncinokkit itti, "Mpannoka oMiccie."

²¹ Akin ipittathok itti, "Ana oung okkwen? Oung olliai?"

Ana kwi'rekathet itti, "Mpakannoka ollia."

Ana okin thipittathok itti, "Ana oung pul ipernte lon loKapiki?"

Kwothianthet kin tit itti, "Aa."

²² Ittina p'r'in akin i'rekathok itti, "Ana oung okkwen? I'rethenin lon ilanin onekine ul iothiothenin. Ngkwi're itti oung oththa?"

²³ OIuanna pothiatherit llon lopul pothernte lon loKapik olcaia ili're itti,

"Oun po're ipaik pakkakkaro nti ithampang, api're itti,

'Nokkinthet Ili kathar koco'rotheik.' "

²⁴ Ittina ul woPriccin iarothilathe, ²⁵ ipittat oIuanna itti, "Ana ngkwonin akka aethet ul mamuthie amma ngkwannoka oMiccie ana manna

okonnoka oIlia ana manna okonnoka pul poth-ernte lon loKapik?”

²⁶ AIuanna othiat tit itti, “Mpethet non mamuthie ngng'ri, anaruk opilin paik ianon ipanon thomma. ²⁷ Ook ipamakothin ook ipa mpakan-nekko nan itti mpak'rinok lo'rak lowok.”

²⁸ Elli appik lokkattathe noka'ran koPeththania nokuthut korue toÜrüthün nthokarkan nacingki ummot ngngin, na aIuanna pokat akwikket ul mamuthie.

OIeccuo, thungkat thoKapik

²⁹ Ngorrot ngen oIuanna pimmakathe oIeccuo akwanthan naak akwi'rekat itti, “Nantokatha, thungkat thoKapik okkwi ipapa're lon ilokithak cik nnocapu. ³⁰ Ook ipa mpokat cik aneret akka mpi'ret itti, ‘Pul ipamakothin prik naun akka kwokat cik amparthuk okwonta.’ ³¹ Manna inenni oun ngka kin mpommak itti kwaka okkwen anaruk lon ila mpaik pikkenthet ul mamuthie ngng'ri othakka itti aul woIccereil inak.”

³² Ittina aIuanna i'rekat lon ila kwimmat itti, “Mpimmat Kanang ikupupure akuo ntothi'rot ere cülökkür ako'rat naak. ³³ Mpakannainarok anaruk okkwi ipothiothin anathikket ul mamuthie ngng'ri, akki'rethin itti pul ipanon thaik thakathecce, Kanang koKapik ka'ro nan akikkat cik naak, ook ipikket ul mamuthie ngKanang ikupupure. ³⁴ Mpimmat ana mpaik pi're ila mpimmat itti ook ukul woKapik.”

Ul iammakot oIeccuo wocittokit

³⁵ Ana ngorrot ngen, oIuanna pokat cik akwoco'ro nnul iammakothok we'ra. ³⁶ Kwimmakathe oIeccuo akwoppo cinang. Ana kwi'rekathe itti, "Nokatha thungkat thoKapik the're."

³⁷ Anakka ul iammakothok ie'ra woccikothe akwi're lon elli, okin thomakathe oIeccuo.

³⁸ Manakka oIeccuo polliakothe, akwimmakat kin akin omakothok akwipittat kin itti, "Ngintha akka annokwariccat?"

Okin thi'rekathe itti, "Pul ipangkene, kaman kang kaik kartha?"

³⁹ Akwi'rekat kin itti, "Nanthan annathokatha."

Menik akin oingkat akin othokathakat na kwokat akwikkoik ana okin thikkatheik cipin cen okin aththut ana cingki cokat coco'rin cocipin.

⁴⁰ Anthrauc opang poCamaan oPoththuruc okin nti iakin ithe'ra ithoccikothe lon ila Iuanna pi'ret akin omakathok. ⁴¹ Lon ila Anthrauc pokkothe cittokit itti kwiothe opang poCamaan akwerekathok itti, "Onin thiothe oMiccie okkwi ipa Kapik kothiothe." ⁴² Ana kwonakathok na aIeccuo.

Ana oIeccuo pokathakathok ana kwi'rekathe itti, "Ngkwocot k'ran itti oCamaan ukul woIuanna. Ngkwakkarako itti oCcappa" (ilonu itti oPoththuruc).

OIeccuo pakkaro oPilippic ana oNathanail

⁴³ Ana ngorrot ngen, oIeccuo pi'rekathe itti kwaeo noththok poCelil ana kwiathe oPilippic ana kwi'rekathok itti "Omakothin."

⁴⁴ OPilippic pokat ponoka'ran koPeththcceitha ammakka Anthrauc ana oPoththuruc.

⁴⁵ OPilippic piathe oNaththanail akwi'rekathok itti, "Onin thiothe okkwi ipa oMucca pappokurrot lon len iatham wothonce'ret lon cik ana ipa ul wothernte lon loKapik wokurrot lon len cakuruk itti oIeccuo poNaccir, ukul woIuccip."

⁴⁶ ANaththanail ipittat itti, "Lon l'rek lakaik iloporot lanthan noka'ran koNacciri?"

APilippic omekathok itti, "A'rik aththokatha."

⁴⁷ Anakka oIeccuo pimmat oNaththanail akwanthan naak, akwi'rekat itti, "Katha okkwempi paIccereil icaricat ipella lo'rek moloko manna lotte."

⁴⁸ ANaththanail ipittathok itti, "Ngkwinan taththa?"

AIeccuo othiat tit itti, "Mpimmarung akka ngkwokat cik icu're copicit, aPilippic parthuk akkarong."

⁴⁹ ANaththanail i'rekat lon mpo're cittan itti, "Pul ipangkene, oung ukul woKapik, oung Ili woIccereil."

⁵⁰ AIeccuo i'rekat itti, "Ngkwocokothe lon nocikit akka mpi'ret itti mpimmathung icu're copiciri? Ngkwimma lon lommaththik nolon elli." ⁵¹ AIeccuo appartat nan itti, "Mpi'ret non lon ilaik icat, onon thimma tothi'rot tanyattatheik ana u'rupa wothonlettat woKapik awaik aku'rot ana uo ntan nokkul wopul iponyi."

2

OIeccuo paprtto ng'ri ngapak

¹ Ana noca'ri ic'rapuruk athipa th'rek okakat cik noka'ran koKana ikaik noththok poCelil ana

onnan poleccuo oingkat than. ² Ana oIeccuo ana ul iammakothok thaththakkarakothe thïpa then cakuruk. ³ Anakka ngapak ngomttathe noul, annan poleccuo i'rekathok itti, "Ngapak ngomttathe."

⁴ Aieccuo i'rekat itti, "Pul ipopari, ngkwi'rethin pothentha? Ca'ri cin carthuk anthan."

⁵ Annan i'rekat ul iareko itti, "Nokkot ila akwi'ret non."

⁶ Ana ummuk* woi'ri wokat cïnang iccik ken w'rakkuruk wokkattathe nomothok, ammakka lon lothonce'ret lon cik loIouth ileret ummuk iothuntakot ana iannothuntako. Kulukku kokat akoneko ng'ri ngoppot.

⁷ Aieccuo i'rekat ul iareko itti, "Noppeppet ng'ri ummuk," akin oppeppet.

⁸ Ittina akwi'rekat kin itti, "Nokkwot ng'ri ngotte nan annethet pul pothïpa." Okin thokkathe menik ana ⁹ pul pothïpa pinathe ng'ri ioporttakot cik angothokkat ngapak, kwommat na ngaat ngngin anaruk ul iareko iokkuret ng'ri winat nan. Ittina kwakkarathe pul ipipot thocipit, ¹⁰ akwi'rekathok itti, "Ul appik wanane ul ngapak ioporot akin antonanekin ng'ri ngokwonyi akin thothe thakathe p'rïn anaruk ngkwangwothe ngapak cik ioporot manna ina."

¹¹ Lon elli lokat lon ilommaththik lonomun nolon ilommaththik ila oIeccuo pokkothe noka'ran koKana noththok poCelil. Kwo-kenekathe ul iammakothok thrik thung ana wocokathe lon lung nomikït men.

* **2:6** 2.6 Ummuk enni wokat wokkattathe nomothok akka ummuk wokkattathe naacok wipo lon lokithak. Lauin 11.33; 15.12

*Oieccuo pakicce ul iakette a'rupu nnoppa
toKapik*

*(Maththa 21.12-13; Markkoc 11.15-17; Lukka
19.45-46)*

¹² Anakka lon elli locothakotho akin uat noka'ran koKappraum akin onnan ana opangon ana ul iammakothok. Okin thikkatheik than ma'ri motte. ¹³ Anakka ca'ri cokamuthe koul woIouth koThaurrot kaman k'rek cik kokat napuththut, aleccuo oku'rat noka'ran koUruccelim. ¹⁴ Ana kwaththiat ul akette kie ana lungkat ana mülökkür noppa toKapik ana opilingon thokat cik akin ikkoik nouppu'rungek akin okwicitto akucci. ¹⁵ Oieccuo pummathe pua akwökiccekat kin appik llungkat ana kie noppa toKapik. Kworrekathe kit kakucci koul iokat cik akwicitto akucci ana oku'rupot uppu'rungek wen cik. ¹⁶ Akwomekat ul iakette mülökkür itti, "Nattet a'rupu enni thapat ncene. Nokorronno othikkie man mongappa ka'ran kocekerek ca'rupu." ¹⁷ Aul iammakothok okwarikat itti lokurrakot itti, "Thiak thoman moKapik thaik thakkwothin."

¹⁸ Ittina aul ittittik woIouth ipittathok itti, "Lon lang liatha ilommaththik ilakene pu'ran ipakkot lon elli ngngin?"

¹⁹ Aleccuo othianthet kin tit itti, "Nokitto tupan toKapik enti ana mpuno prek attang noma'ri m'rapuruk."

²⁰ Aul ittittik woIouth othiat tit itti, "Muntat luput arrial we'ra ana ikken k'rakkuruk (46) ame itti ngkuno noma'ri m'rapuruke?" ²¹ Anaruk tupan toKapik ira kwerethe tokat ka kung.

²² Anakka kurokot nti ithio, aul iammakothok okwarikat lon ila kwi'ret. Ittina akin occokat lon nomiküt lAtham woKapik ana ila oIeccuo peret.

²³ Anakka kwokat cik noka'ran koUrucclim nokamuthe koThaurrot kaman k'rek cik, ul wopot wimmakathe lon ilommaththik ila kwokat cik akwokkot ana wocckathe lon nomiküt lok'ran kung. ²⁴ Anaruk oIeccuo pakannonekset ciküt nakin akka kwinat kin appik. ²⁵ Kwokat pakannangkot itti opilin pi'rethok itti ul warat akka kwinat itti ngimpen akkokat nomiküt mouli onyi.

3

OIeccuo pangkene oNikkothemoc

¹ Pu'rek pokat cik poul woPriccin poccot k'ran itti oNikkothemoc, kwokat nocuththun coul woIouth ittittik. ² Kwainet oIeccuo ngko'ra akwi'rekathok itti, "Pul ipangkene, onin thina itti oung pul ipangkene ipaat noKapik akka pul pella ipakkot lon ilommaththik ila ngkwaik pakkot amma Kapik kella naung."

³ AIeccuo othiat tit itti, "Mpi'rethung lon ilaik icat, amma pul pakannokwonta attang kwakin-nimma ngili ngoKapik."

⁴ ANikkothemoc ipittat oIeccuo itti, "Pul pakwonta taththa appukkwat thomocco? Kwappopakkot icarak connan attang othakka itti akwokwontai?"

⁵ AIeccuo othiat tit itti, "Mpi'rethung lon ilaik icat, pul pella pi'riko ingili ngoKapik amma kwakannokwonta ngng'ri ana ngKanang koKapik. ⁶ Pul iponyi pacco ka nannan ana

naththan anaruk Kanang koKapik kakwono kanang ikaik iaron. ⁷ Onon thonu itti nthakanno-prttakinthet lon lin tit ila mpi'ret, 'Onon thonu itti nthakwonta attang.' ⁸ Kanang kakkurot na kongothe itti kakkurot, onon thaccikot po're pen, anaruk onon nthamma na kaik kanthan ngngin ana na kaik kaeo. Ittina ngkwamma itti pul pakwonta noKanang koKapik tat."

⁹ ANikkothemoc i'rekat itti, "Elli laka taththa?"

¹⁰ Aleccuo othiat tit itti, "Oung pul ipangkene poIecceril. Ana ngkwakannina lon ellii?"

¹¹ Mpi'rethung lon ilaik icat, onin theret lon ilanin thina ana onin thaco'rot lon ilanin thimat anaruk icci onon thakannangkot itti onon thaccikot lon ilanin i'ret non. ¹² Mperenet non lon la'rupu wonocapu ana onon th'rat occokot lon len nomikit ana onon thantocokot lon nomikit taththa amma mperenet non la'rupu worothi'rot? ¹³ Pul pella ipokat tothi'rot, ukul wulluk wopul iponyi akkaat ntothi'rot. ¹⁴ Ana ammakka oMucca ponthothe pinyil kapik ithampang ithonthomat, ittina ukul wopul iponyi wonu itti wanthuttat kapik cakuruk, ¹⁵ othakka itti okkwi ipoccoke the lon lukkul wen nocikit akwiot thikkoik thothupuththuput.

¹⁶ Akka Kapik kongothe ul ncik nocapu appik mono akekat kin ukul wung iulukku, othakka itti amma okkwi ipoccoke the lon lokkul wen nocikit akwokorronno io anaruk akwikkoik thupuththuput. ¹⁷ Akka Kapik kakannothiot ukul wung nocapu ncik appik othakka itti athakma ul nocapu anaruk itti atho'ret kin. ¹⁸ Okkwi

ipoccokothe lon lokkul wen nocik̄it kwakorronno akkmako anaruk okkwi ipakorronno ocokot, kwakkmako nt̄it akka kwakanno occokot lon lokkul woKapik iulukku nocik̄it. ¹⁹ Okin thakkmako ngkathar engki, k'ran ikimmiettoik kaat nocapu ncik appik, anaruk ul w'rat aangat lon loi'r̄imak akka lon ilakin thokkothe lokat lokithak. ²⁰ Okkwi ipakkot lon ilokithak kwa'rat k'ran ikacco ana kwakannanthan nok'ran ikacco akka kwapelle itti lon lung linako nan. ²¹ Anaruk okkwi ipakkot lon loporot kwanthān nok'ran othakka itti alinako nan itti lon ila kwokkothe lokkattathe mpu'ran poKapik."

OIuanna pomamuthie peret oIeccuo

²² Anakka elli lothakothe oIeccuo ana ul iammakothok thoiŋkathe nocipit conoththok poIouthia, akwikkat cik than akin aththungon akwikket ul mamuthie. ²³ OIuanna pokat cik cakuruk akwikket ul mamuthie noka'ran kEnun iccik koCcalim akka ng'ri ngokat cik than ngoppot ana ul wokat cik aukwo than woppot athocere mamuthie. ²⁴ Lon elli lokat cik aIuanna parthuk onekkettat ikor-rkkor. ²⁵ Ul woIuanna iammakothok w'rek wikkatheik a'rettaro nan okin opul p'rek poIouth no'ron lothothunto. ²⁶ Opilingon noul iammakot oIuanna akkakanthet oIuanna akin i'rekathok itti, "Pul ipangkene, opaththi ipanon thokat cik annaththe'ra nokarkan k'rek koUruthun ipa ngkwerethe paik pikk̄et ul mamuthie ana ul appik waik waukkwinok athocere mamuthie."

²⁷ OIuanna pothiatherit itti, "Pul pacco a'rupu amma Kapik kethok tulluk. ²⁸ Ana onon thina

nan akka mpi'ret itti, 'Mpakannoka oMiccie anaruk mpothilathe tokit kung.' ²⁹ Pul ipocura ipipot, ook p're popul ipopari ipittat. Opuruko ipaat ithipa thopul ipipot pa'rikot cik ana occikot lon lung akwopirakat noka kannan amma akwocikot po're popul ipipot. Mpopirat noka inenni p'rin. ³⁰ Kwonu itti kwaka priik, ana mponu itti mpaka potte.

³¹ Okkwi ipanthan ntothi'rot priik na'rupu appik, okkwi ponocapu paka ponocapu ana kwere ere pul ponocapu. Okkwi ipaat ntothi'rot priik noul ana a'rupu appik. ³² Kwerethe lon ila kwimmat ana occikot anaruk pul pella poccikinthok lon lung. ³³ Pul ipocckithe lon len, poco'rothe lon itti Kapik ki're lon icat. ³⁴ Akka pul ipa Kapik kothiothe pere lon loKapik akka Kapik kethettot Kanang ikupupure koppot. ³⁵ Oththan pokkul pongothe ukul ana kwethok lon ikkun wung appik. ³⁶ Okkwi ipocckithe lon nocikit lokkul, kwiot thikkoik thothupuththuput ana okkwi ip'rat occikot lon lokkul, kwakan-
niot thikkoik thothupuththuput akka thuaka thoKapik tha'rungskot naak."

4

Oleccuo perene pul ipopari poCcamirin

¹ Aul woPriccin occikat itti ul wokat cik aukkine oleccuo ana kwokat cik akwikket kin mamuthie ana ul iammakothok wakot cik artakat nan woppot noul woIuanna. ² Ana ilokat cik icat itti, okonnoka oIeccuo akkokat cik akwikket ul mamuthie anaruk ul iammakothok

akkokat cik aikket ul mamuthie. ³ Manakka oIec-
 cuo poccikothe lon len kwoththekathe noththok
 poIouthia akwopakkat attang noththok poCelil.
⁴ Anakka kwokat cik akweo ikathar, kwap-
 ponu itti kwappo noththok poCcamira. ⁵ Ittina
 kwakkakathe noka'ran ikoccot k'ran itti Cukar
 noththok poCcamira iccik kocapu ica olakup
 pethet opei oIuccip. ⁶ Ana tok toIakup tokat cik
 ceneket ana oIeccuo pappokinyanet kurtti ak-
 wikkat cik iccik korok. Ana cingki cokat acangko
 ippa. ⁷ Anakka pul ipopari poul woCamirin paat
 thorok itti pathokkwo ng'ri, oIeccuo pi'rekathok
 itti, "Ethin ng'ri anikko." ⁸ (Ul iammakothok
 waweot icarak coman athokette thu'rit.)

⁹ Apul ipopari poCamirin i'rekathok itti, "Oung
 pul poul woIouth ana oun pul poul woCamirin
 ana ngkwipittothin itti mpethung ng'ri taththa?"
 (Akka ul woIouth wakinnikkarot ng'ri okin ul
 woCamirin.)

¹⁰ AIeccuo othiantok tit itti, "Amma ngkwinat
 thethet nuthuk thoKapik ana okkwi ipaik pipit-
 tothung ng'ri itti kwikko, ngkwipittothok ana
 kwethung ng'ri ngothikkoik thothuputhuput."

¹¹ Apul ipopari i'rekat itti, "Ili, ngkwella papu
 ipakkura ng'ri nti irok ana tok tukwit. Ngk-
 wiot ng'ri ngothikkoik thupuththuput kartha?"

¹² Oung akkrük nangappa pin olakupi ipethet nin
 tok enti, ira kwikkot ng'ri ntita ana nyukul nyung
 ana a'rupu worua wungi?

¹³ AIeccuo othiat tit itti, "Okkwi ipikko
 ng'ri noi'ri engi, pica pappokkwothok at-
 tang, ¹⁴ anaruk okkwi ipikko ng'ri ianethok,
 pica pakorronno appokkwothok, akka ng'ri ia

anethok ngathakka caku'rang coi'ri icallo ng'ri thothuputhuput.”

¹⁵ Apul ipopari i'rekathok itti, “Ili, ethin ng'ri ngen othakka itti apica okorronno okkwothin ana anokorronno anthan thorok itti mpathokkwo ng'ri attang.”

¹⁶ Akwi'rekat pul ipopari itti, “Ngko athakkaro olle pang annanthan annaththe'ra.”

¹⁷ Apul ipopari othiat tit itti, “Mpella p're.”

Aleccuo omekathok itti, “Icat, lon ila ngkwi'ret laik icat. ¹⁸ Lon ilaik icat itti ngkwonat e're ukuluk ana pul ipanon thaik ina okorronno oka p're pang. Ittina ila ngkwi'ret laik icat.”

¹⁹ Apul ipopari i'rekat itti, “Ili, mpakatha ere ngkwapul potherente lon loKapik. ²⁰ Ongappan thoul woCamiria thokat cik akin a'rat nga'rama noco'rong enci anaruk onon ul woIouth thi'ret itti ka'ran nanin thonu itti intha'rat nga'rama kaik noka'ran koUrucelim.”

²¹ Aleccuo i'rekat itti, “Pul ipopari, occikothe lon lin, ca'ri c'rek caik canthan ica anon okorronno a'ranthet Kapik ongappa nga'rama noco'rong enci ana manna noka'ran koUrucelim. ²² Onon thoul woCcamirin tha'rane a'rupu nga'rama ianon thomma, onin ul woIouth tha'rane a'rupu nga'rama ianin thina akka tho'rettat thanthan noul woIouth. ²³ Anaruk ca'ri caik canthan ana cei caat amma ul ia'ra nga'rama icaricat a'rane ongappa nga'rama ngkanang ana llon ilaik icat akka okin itha'ra nga'rama ammakka enthi akka ongappa paik pakwantot. ²⁴ Kapik kaKanang ana okkwion

itha'ranok nga'rama thonu itti okin tha'ra nga'rama ngkanang ana lon ilaik icat."

²⁵ Apul ipopari i'rekat itti, "Mpina itti oMiccie paik panthan okkwi ipa Kapik kaik kathiot, ana amma kwaan kwakeneron lon ncik appik."

²⁶ Ittina aIeccuo i'rekat itti "Oun pen ipaik perenung."

Ul iammakot oIeccuo wakkaprttakinok

²⁷ Ana ittina aul iammakothok okkaprttakat ntan akin oprttakat tit akka okin thatthiothok akwerene pul ipopari. Anaruk pul pella ipipitathe itti, "Ngintha akkaik?" Ana manna itti, "Ngkwerene pul empi akaintha?"

²⁸ Ittina apul ipopari oththekat nokummuk koi'ri ikakkwaththokkwo ngng'ri apollat opakkat icarak coman api'rekat ul itti, ²⁹ "Nantanthan, annathokatha pul p'rek pi'rethin lon ncik appik ila mpokkothe, pul pen pikko paka oMicciei?" ³⁰ Ul wakkakathe nti icarak coman appik athokatha oIeccuo.

³¹ OIeccuo pappakanno'rko pap'rek aththik, aul iammakothok i'rekathok itti, "Pul ipangkene, o'rku a'rp'rek."

³² Anaruk kwomekathekin itti, "Mponu thu'rit itha ano'rko thanon thomma."

³³ Ul iammakothok wikkatheik aerettarne itti, "Opilin paththoka ponanok thu'riri?"

³⁴ AIeccuo i'rekat itti, "Thu'rit thin thokkot lon ila okkwi ipothiothin pongothe ana omartto ngre ngung. ³⁵ Onon thonu lon lanni're itti, 'Anok wokwentakot woco'rin aul antokioi?' Anaruk mpi'ret non itti, nantokatha opon wathuput thaat p'r'in itti wakecca. ³⁶ Ana pul ipakio

pocot a'rupu nti ithokio, ana kwaik pa'rntot mil mothikkoik thothupuththuput othakka itti akkwi ipee ana okkwi ipakio opira noka aththuththe'ra. ³⁷ Ittina lon ili'rettat itti, 'Okkulukku pee ana opilin pakio' laik icat. ³⁸ Mpothiothenon anothokio a'rupu ianon thakannora. Opilingon thorekot ngre ngonthomat kannan ana onon thathokio a'rupu wore ngen."

³⁹ Ul woppot woCcamirin woricararak coman cen wocokathe lon loleccuo nomikit men akka pul ipopari pi'ret itti, "Kwi'rethin lon ila mpokkothe appik." ⁴⁰ Anakka ul woCcamirin wainok womekathok itti kwikkoik okin aththut ana kwikkatheik ma'ri me'ra. ⁴¹ Ana nti ilon lung ila kweret, ul warttakathe nan woppot ana wocokathe lon lung nomikit men. ⁴² Okin thi'rekathok pul ipopari itti, "Onin thaik thakan-nocokot lon nomikit min nti ilon ila ngkwi'ret tulluk anaruk nti ilon ila anin thocokithe nunu win, ana onin thina p'rin itti pul empi potho'ret ul ncik appik."

Oleccuo pittiet ukul wopul iparekine ili irik

⁴³ Anakka kwikkot cik ma'ri me'ra, kwo- ingkathok noththok poCelil. ⁴⁴ Cene oleccuo ngka kung pappi'ret itti pul pothernte lon loKapik paul wung wakannothianok cik noka'ran kung. ⁴⁵ Anakka kwaan noththok poCelil, ul wonoththok poCelil wikkiekathok cik lon loporot, akka okin thokat thimmat lon ila kwokkothe noka'ran koUruccelim nokamuthe koThaurrot kaman k'rek cik akka okin thokat than.

⁴⁶ OIeccuo pappropakkat noka'ran koKana at-tang noththok poCelil na kwoprrot ng'ri cik athakkakat ngapak. Ana pul p'rek pokat cik than parekine ili irik ana ponat ukul wongo ana wokat noka'ran koKapprnaum. ⁴⁷ Manakka pul empi pockithe itti oIeccuo paat nnoththok polouthia ana kwaik noththok poCelil, kwoingkanthok ana kwipittathok itti kwanthan akwathothikkienok ukul woporot, iokat cik ere wio.

⁴⁸ AIeccuo i'rekathok itti, "Ul enni onon thakanno occokot lon loKapik nomikit mon amma nthakannimma lon ilommaththik lokkat-tathe."

⁴⁹ Apul iparekine ili pen omekat itti, "Ili tit eo aukul warthuk io."

⁵⁰ AIeccuo othiat tit itti, "Opakkothe, ukul wang wakkoik." Apul occikat lon loIeccuo apopakkat tuan. ⁵¹ Anakka kwokat nokathar akwopakkot tuan, aul iarekinok tuan okttat iaak llon itti ukul wang iocura wokkot cik. ⁵² Anakka kwipittothekin itti ukul wothakkat woporot acin, okin thi'rekathok itti, "Lü loco'rot nti iaak meccin icingki ippa." ⁵³ Ittina aththan pokkul inakat itti ca'ri cen ica oIeccuo pi'rethok itti, "Ukul wang wakkoik." Ana menik ook ana ul woruan thanung occokat lon nomikit loKapik.

⁵⁴ Lon ilommaththik elli ile'ra ila Ieccuo pokkothe akka kwaan noththok polouthia akweo noththok poCelil.

5

OIeccuo pittiet kimico

¹ Noma'ri motteik oIeccuo poku'rathe noka'ran koUruccelim nokamuthe koul woIouth. ² Ana ciki icarak coman conoka'ran koUruccelim, k'ral kokat iccik kokathat kolungkat konat k'ran ngkarru koIpranin itti k'ral koPeththictha ikokkwettathe itho'rküt nucu ukuluk. ³ Ul woppot wokakkat cik aicacat cik than ana anna ul than iongo ana i'rimathe ana iaimeo [akin o'rillikot ng'ri iauro. ⁴ Ana ca'ri c'rek u'rupa wothothilettat woIli wokat cik than a'rüntitto ng'ri ana okkwi iporpot tit cittoküt ai'ri nga'rüntittakot kwittat nnomio ima kwonat.] ⁵ Pul p'rek pokat cik than pongo luput arrial ana alkaire ana ikken mormor (38). ⁶ Anakka oIeccuo pimmarok akwicat cik, akwinakat itti pul pen pokat cik ittina luput loppot akwipittat pul pen itti, “Ngkwongothe itti ngkwathakka poporori?”

⁷ Apul ipongo othiat tit itti, “Pul pella ipittarothin itti parpekin ik'ral amma ng'ri ngo'rüntittakot ncik. Amma mpenekket itti mparpo ik'ral anothiot opilin poththethe toküt kin.”

⁸ Ittina aIeccuo i'rekathok itti, “Urokothe kapik, aneko a'rangkal wang aeo.” ⁹ Apul othakkakat poporot accokkot ana ponekathe a'rangkal ana poingkathe.

Lon elli lokkattathe noca'ri caCcepith, ¹⁰ ana ul woIouth wi'rekathe pul ipothakkat poporot itti, “Ca'ri enci caCcepith ana lon lothonce'ret lon cik lakannokorrnung itti ngkwaneko a'rangkal wang.”

¹¹ Anaruk pul pi'rekathe itti, “Pul ipothikkierin poporot pi'rethin itti, 'Oneki a'rangkal wang

aeo.' "

¹² Okin thipittathok itti, "Pul piatha pen ipi'rethung itti oneki a'rangkal wang aeo?"

¹³ Pul ipothakkat poporot pappommat k'ran kwokkwi ipittiethok akka oIeccuo pappi'rikot icungkut coul icokat cik cınang.

¹⁴ Ana noma'ri motte oIeccuo paththiathok noppa toKapik akwi'rekathok itti, "Antocçikot, katha ngkwothakkat poporot kirrnni appokkot lon l'rek ilokithak akka al'rek ainung ilokithak kannan." ¹⁵ Pul poingathe ana paththi'rekat ul woIouth itti, oIeccuo akkothikkierok poporot.

Thikkoik nthocçokot lon lokkul

¹⁶ Ittina ul woIouth wikkatheik akkiet oIeccuo thiak akka kwittiethe pul pen noca'ri caCcepith. ¹⁷ OIeccuo pi'rekathekin itti, "Ongappa paik pareko appinappin ana manna inenni ana oun cakuruk paik pareko." ¹⁸ Ana nti ilon elli ul woIouth wikkatheik akwancot kathar ikakin okkwothok ngngin, okorronno oka itti akka kwarrothe lon laca'ri caCcepith cik tul-luk, anaruk akka kwokat cik akwakkaro Kapik itti oththan pung, ana akwarppithie ka kung ngKapik.

¹⁹ OIeccuo pothianthet kin tit itti, "Mpi'ret non ilaik icat, ukul wakannokkot ngre nti ica cung pellek, wakkot ngre ia kwimmat oththan akwokkot, akka ngre ia aththan okkot ukul wakkot cakuruk. ²⁰ Oththan pokkul pongothe ukul ana kwakenek lon ila akwokkot appik. Ana oththan pokkul pakene ukul manna a'rupu wittittik nenni ia akwokkot nnothittiet pul empi.

Ana onon thaprttakot tit icaricat. ²¹ Ana ammakka oththan purokie ul illet nti ithio ana ethet kin thikkoik, ana cakuruk ukul wethet okkwion thikkoik itha kwongothe itti kwethet. ²² Ana icci oththan pokkul pakannakkma pul p'rek anaruk kwethet ukul lon lothakkma cik appik ikkun, ²³ othakka itti aul appik othiane ukul cik ammakka okin thothianet oththan cik. Okkwi ipakannothiane ukul cik kwakannothiane oththan cik ipothiöthok.

²⁴ Mpi'ret non lon ilaik icat itti, okkwi ipaccikot lon lin ana occokot lon nocikit lokkwi ipothiöthin kwikkoik thothupuththuput ana kwakannakkamako kwarrothe thio cik akweo nothikkoik. ²⁵ Mpi'ret non lon ilaik icat itti, ca'ri caik canthan ana manna cei caat amma okin ithillet occikot po're pokkul woKapik ana okkwion ithocikotho the thakkoik. ²⁶ Ana inakka oththan pokkul akkonu pu'ran pothikkoik ika kung, kwethet ukul wung pu'ran pothikkoik cakuruk ika kung. ²⁷ Ana kwethok lon lothakkma ikkun akka ook ukul wopul iponyi.

²⁸ Nokorronno oprttakot tit no'ron elli akka ca'ri caik canthan caul appik iaik impu occikot po're pung ²⁹ ana okin thappot thapat ana okkwion ithokkothe lon loporot thuroko akin o'rungkat cik, ana okkwion ithokkothe lokithak thuroko akin akkmakat. ³⁰ Mpakannokkot lon l'rek ngka kin pellek, mpakkma ammakka anoccikot ali'rettathin ana thakkma thin thoco'rotheik akka mpakannangkot itti mpapirie ka kin noka anaruk okkwi ipothiöthin.”

Lon ileret oIeccuo

³¹ “Amma oun akkopri itti mperet lon lin ngka kin there thin thakannoka icat. ³² Opilin p'rek paik peret lon lin ana mpina itti theret lon lin ilon lang laik icat. ³³ Onon thothinthet oIuanna ul ana kwerenet kin lon ilaik icat. ³⁴ Okonnoka itti mpongothe theret ithoul ionyi erethin ngngin anaruk mpi'ret elli othakka itti anno'rettat. ³⁵ OIuanna pokat k'ran kothik ikoccot akocciekat cik ana onon thopirakathe noka ngk'ran kothik thung papotteik.

³⁶ Anaruk mponu pap'rek priik iperethe nolon loIuanna. Akka ngre ia ngappa pethin itti mpa-martto ana iampaik pakkot ngakene itti ongappa pothiothin. ³⁷ Ana ongappa ipothiothin perethe lon lin ngka kung. Onon thakannocikot po're pung ana manna imma ka kung, ³⁸ ana manna lon lung lella ianon akka onon thakannocokot lon nomikit lokkwi ipa kwothiothe. ³⁹ Onon thakkakkarot natham noKapik kicce akka onon thi're itti amma nthakkakkarot ana onon thiot thikkoik thothupuththuput. Natham nen neret lon lin, ⁴⁰ ana icci onon th'rat ainin anniot thikkoik.

⁴¹ Mpakannangkot thopirie noka thoul ionyi ⁴² anaruk mpina non. Mpina itti onon thella thongat thoKapik nomikit mon. ⁴³ Mpaat ngk'ran kongappa ana onon th'rarin anaruk amma opilin paat ngk'ran kung onon thangat lon lung. ⁴⁴ Onon thaccokot lon nomikit taththa amma onon thapirarne noka, anaruk onon thaik thannokwantot thopira noka ithaik thanthan nakkwi ipa Kapik tulluk?

⁴⁵ Anaruk nokorronno i're itti mparukwet

non tokit kongappa. OMucca akkarukwet non, ook ipanon thonekkethe mikit nan. ⁴⁶ Amma onon thatthocckothe lon loMucca nomikit mon onon thaaccokothe alin akka ila kwokurrot kwerethin ngngin. ⁴⁷ Anaruk onon thaccokot lon ila ani'ret non taththa amma onon thakonnocokot lon nomikit ilokurrakot?"

6

Oieccuo pa'rikie ul cik athar ukuluk

¹ Ana noma'ri motte oIeccuo parrathe nocarkan c'rek corok irapangka toCelil ironu k'ran cakuruk itti tok irapangka toThipiria, ² ana ul woppot womakathok akka okin thimmat lon ilomaththik ila kwokkothe noul iongo. ³ Aieccuo oku'rat no'ra woco'rong akwikkat cik okin oul iammakothok. ⁴ Kamuthe koul woIouth koThaurrot kaman k'rek cik kokat akokko napuththut.

⁵ Anakka oIeccuo pokathat cik akwimmakat ul woppot anthan naak, akwi'rekat oPilippic itti, "Oron thakerine ul enni thu'rit kartha akin o'rko?" ⁶ Kwipittot elli othakka itti akwenekkek anaruk kwappinat ila kwaik pathokkot.

⁷ APilippic othianthok tit itti, "Tat akka manna akucci iarekitta ngngin anak mormor wakanokero thu'rit thekko noul enni itti okkulukku pinot manna thothe."

⁸ Apilin nti iul iammakothok ipoccot k'ran itti Anthrauc opang poCcamaan oPoththuruc i'rekat itti, ⁹ "Ukul w'rek wei wonu arrakith ukuluk ana ape we'ra, anaruk wekko noul taththa enni ioppot ittina?"

¹⁰ Aieccuo i'rekat kin itti, “Nikkie ul cik.” Ana taco tokat cik toppot noka'ran ken ana ul wikkatheik nan, ul iomura wokat athar ukuluk (5,000). ¹¹ Oieccuo ponekathe arrakith akwopirakanthet Kapik noka, athikkettakat ul ikkiettat cik ammakka okin ipittot. Kwokkathe ammakka menik nape. ¹² Anakka ul wo'rkot cik mono oththakakat, kwi'rekathe ul iammakothok itti, “Na'rntot thu'rit ithokwentakot nan. Nokorronno okorronno itti thakittakot cik thoththe.” ¹³ Ittina okin tha'rntathe thu'rit ithokwentakot nan akin oppepekat nyalünthüng attul ana ikken ke'ra narrakith iokat ukuluk ia ul io'rkot nan wokwentako.

¹⁴ Anakka ul wimmat lon ilommaththik ila oieccuo pokkothe, okin thikkatheik akin ere itti, “Īcarīcat pul empi pothernte lon loKapik ipokat ponu itti panthan nocapu ncik appik.” ¹⁵ Aieccuo inakat itti okin thaik thathothikkiek ili mpu'ran akwoingkat toco'rong ngka kung pellek.

Oieccuo panyaro no'ra woi'ri norok toCelil

¹⁶ Anakka cipin capot aul immakothok uat thorok irapangka, ¹⁷ akin arrat ikuppu'rung konoi'ri akin arrot tok irapangka eo noka'ran ikoccot k'ran itti Kapprnaum. Anakka okin thokat cik akin eo, ittina ngī'rimak ngokat ngo'rot cik ana oieccuo papparthuk anthan nakin. ¹⁸ Akanang ikkat cik akokkurarot cannan ana ng'ri ngikkatheik athapllarot ongku'rot ciki ithi'rot thokapik. ¹⁹ Anakka okin tholliethe kuppu'rung konoi'ri ipanan porok irapangka, akin immakat oieccuo akwonyaro no'ra woi'ri akwanthan nakin ana okin thipathe n're.

²⁰ Anaruk kwi'rekathekin itti, “Oun ana nthakorronno opelle.” ²¹ Okin thokat thongothe itti okin tharriethok ikuppu'rung. Ana akka okin thokkothe ellrik okin thaththiat itti okin thaata nok'ran nakin thokat cik akin eo.

²² Ana ngorrot ngen aul iokwentakot nokuthut korok inakat itti kuppu'rung kulukku kokat cik ceneket, ana oIeccuo pappakannarrot tit okin oul immakothok, anaruk weot thellek. ²³ Ana uppu'rung wonoi'ri w'rek wakkakathe noka'ran koThipiria aco'rat iccik koka'ran na ul wo'rkothe thu'rit itha oIeccuo popiranet Kapik noka nan. ²⁴ Anakka ul waththiot itti oIeccuo ana ul immakothok wella ikuppu'rung konoi'ri okin tharathe iuppu'rung wen akin oingkat noka'ran koKapprnaum akin othokwantot oIeccuo.

OIeccuo pathu'rit thothikkoik

²⁵ Anakka okin thiothok nocarkan corok, okin thipittathok itti, “Pul ipangkene, ngkwaat cene acintha?”

²⁶ AIeccuo othiat tit itti, “Mpi'ret non ilaik icat, onon thaik thakwancothin okorronno oka itti akka onon thimmat lon ilommaththik anaruk akka onon tho'rkot thu'rit ana onon thoththakathe. ²⁷ Nokorronno orekine thu'rit ithakittako anaruk norekine thu'rit ithikkoik thuputhuput itha ukul woKapik ethet non. Akka Kapik kethok lon len ikkun itti kwakkot.”

²⁸ Ana okin thipittathok itti, “Onin thakkot taththa inokkot ngre inga Kapik kongothe?”

²⁹ AIeccuo omekat kin itti, “Ngre ngoKapik ngaik itti ngkwaccokot lon nocikit lokkwi ipa kwothiothe.”

³⁰ Ittina akin ipittathok, itti, “Lon liatha ilakene ilommaththik inimma inoccokot lon lang nomikit? Ngintha akka akkot? ³¹ Thiki thin thoma'rot tho'rkot thu'rit ithoccot k'ran itti manna ithampang ithonthomat, ammakka lokurrakot itti, 'Kwethet kin thu'rit ntothi'rot akin o'rko.”

³² OIeccuo pi'rekathekin itti, “Mpi'ret non lon ilaik icat, okorronno oka oMucca akkethet non thu'rit ntothi'rot anaruk ongappa pin akkethet non thu'rit ithaik icat ntothi'rot. ³³ Akka thu'rit thoKapik thakkwi ipanthan ntothi'rot ana ethet capu ncik appik thikkoik thung.”

³⁴ Akin i'rekat itti, “Pul ipangkene, nciki inenni ethet nin thu'rit enthrik.”

³⁵ AIeccuo i'rekat itti, “Oun thu'rit thothikkoik. Okkwi ipainin ti takorronno okkwothok ana okkwi ipoccoke the lon lin nocikit cung pica pakorronno appokkwothok. ³⁶ Anaruk ammakka mpi'rethenon itti, onon thimmarin ana icci onon th'rat occokot lon lin nomikit mon. ³⁷ Okkwion itha ongappa ethin thainin ana okkwi ipainin mpakannokiccek. ³⁸ Akka mpakannanthan ntothi'rot itti mpathokkot lon ila mpongothe, anaruk itti anothokkot ilakkwi ipothiothin itti mpathokkot. ³⁹ Ana ilen elli ila okkwi ipothiothin pongothe itti mpakannuret opilin cik aththik nti iakkwion itha kwethin appik ana cakuruk itti anurokiekin noca'ri cothakkma. ⁴⁰ Akka lon ila oNgappa pongothe itti okkwi ipainet ana occokot lon len nocikit piot thikkoik thothupuththuput, ana mpurokiek nti ithio noca'ri cothakkamako.”

⁴¹ Ul woIouth wikkatheik aerekot no'ron ila kwi'ret itti, "Oun thu'rit ithaat ntothi'rot."

⁴² Okin thi'rekathe itti, "Okonnoka oIeccuo empi, ukul woIuccip ana onnan paron thinai? Taththa akka akwi're itti, 'Mpaat ntothi'rot'?"

⁴³ Aieccuo othiat tit itti, "Nokorronno erekot.

⁴⁴ Pul pella ipainin amma ongappa ipothiothin pakannonakok, ana mpurokiek nti ithio noca'ri cothakkamako. ⁴⁵ Lokurrakot inatham noul wothernte lon loKapik itti, 'Okin appik thaKapik ongene.'

Ana okkwi ipaccikot lon longappa ana ina lon naak painin. ⁴⁶ Pul pella ipimmat Kapik anaruk okkwi ipaat noKapik, ook pulluk akkimmat oththan. ⁴⁷ Mpi'ret non lon ilaik icat okkwi ipaccokot lon nocikit pikkoik thupuththuput.

⁴⁸ Oun thu'rit thothikkoik. ⁴⁹ Thiki thon tho'rkot thu'rit ithocot k'ran itti mannaa ithampang ithonthomat, ana icci okin thillet akka mannaa mokat makannoka thu'rit thothikkoik. ⁵⁰ Anaruk thu'rit thei ithaat ntothi'rot itha pul o'rko ana pakannio. ⁵¹ Oun arrakith wothikkoik iaat ntothi'rot.

Ana okkwi ipa'rko narrakith enni kwakkoik thupuththuput. Arrakith enni waka kin ikanethet thikkoik thoul wonocapu ncik appik."

⁵² Ittina aul woIouth ikkat cik a'rettakot cannan ai're itti, "Pul empi pethet ton ka kung aron o'rko taththa?"

⁵³ Aieccuo i'rekat kin itti "Mpi'ret non lon ilaik icat amma ngkwakanno'rko ka kokkul wopul iponyi ana ikko nguccuk, ngkwella thikkoik.

⁵⁴ Anaruk okkwi ipa'rko ka kin ana ikko nguccuk ngin kwonu thikkoik thothupuththuput ana mpurokiek noca'ri cothakkamako. ⁵⁵ Akka

ka kin ana ngüccük ngin thathu'rit icaricat. ⁵⁶ Okkwi ipa'rko ka kin ana ikko ngüccük ngin kwa'rungskot iaun ana mpa'rungskot iaak. ⁵⁷ Ana ammakka ongappa ipaik pothiothin ana mpaik akka kwaik, ittina okkwi ipa'rko ka kin kwakkoik nti iaun. ⁵⁸ Thu'rit enthi ithaat ntothi'rot. Thiki thon tho'rkot thu'rit thomannaa ana okin thillet anaruk okkwi ipa'rko nothu'rit enthi kwakkoik thupuththuput.” ⁵⁹ Kwi'ret lon elli akkwokat cik akwongkene nocuththun ca'rama noka'ran koKaprnaum.

Ul iammakothok woppot woththekathe naak

⁶⁰ Anakka ul woppot nti iul iammakothok woccikothe thongkene enthi ai'rekat itti, “Thongkene enthi thonthomat kannan. Oththa akkangkot?”

⁶¹ Aleccuo inakat nan itti ul iammakothok wokat cik a'rettakinthet thongkene then akwi'rekat kin itti, “Alin elli luethenon ka ciki? ⁶² Laka taththa nanon amma annimma ukul wopul iponyi aku'rot tothi'rot, aeo na wokat ncinnan? ⁶³ Kanang koKapik keettot thikkoik, ka kella lon cik, lon ila mperenet non lakanang kathikkoik. ⁶⁴ Ana icci opilingon th'rek thaik ianon thakonnocokot lon nomiküt men.” Akka oleccuo pinat nan ncima'rot okkwion ithakannocokot lon nociküt ana okkwi ipathokerok. ⁶⁵ Kwo'rungskathe nan akwere itti, “Ilen elli akka mpi'renthet non itti pul pella painin amma ongappa pannethin ngok.”

⁶⁶ Nci noca'ri enci ul iammakothok woppot wocottakathe nti iaak ana w'rakathe om-makothok.

⁶⁷ Aleccuo ipittat kin ithattul ana ikken ke'ra itti, "Onon thongothe itti onon thaeo cakuruki, okorronno oka meniki?"

⁶⁸ ACcamaan oPoththuruc othianthok tit itti, "Ili, onin thaine oththa? Akka oung akkonu lon lothikkoik lothupuththuput. ⁶⁹ Onin thoccoke the lon nomikit ana onin thina itti oung ipupure poKapik."

⁷⁰ Aleccuo othiat tit itti, "Oun akkakan-nakkaronon ithattul ana ikken ke'rai? Ana icci okkulukku ntianon pothakkat pul pothopulut." ⁷¹ Kwokat akweret oIoutha ukul woCcaman coIcikkariuththi, okkwi ipokat ntiakin ithattul ana ikken ke'ra, anaruk noma'ri m'rek ook ipathokerok.

7

Opangon thoIeccuo th'rat occokot lon nomikit

¹ Anakka elli lomttathe aleccuo oingkat na'ran koCelil othakka itti akwoka ciththan nnoththok poIouthia akka ul woIouth wokat cik a'rikothok itti wakkwothok. ² Anaruk akka ca'ri cokamuthe koMü'rük koul woIouth kokat akokko napuththut, ³ apangon thoIeccuo i'rekathok itti, "Ngkwonu itti ngkwaththe noka'ran engki aeo noththok poIouthia othakka itti aul iammakothung imma lon ilommaththik ilakkot. ⁴ Pul pella ipongothe itti pathakka pul iprik tokit koul ana aporeko nthu'ran. Ana inakka ngkwaik pakkot lon ammakka elli, okene ul ka kang nocapu ncik appik." ⁵ Opangon manna thaththakannocokot lon lung nomikit men.

⁶ Ittina aIeccuo i'rekat kin itti, "Ca'ri cin icekkot nan carthuk anthan anaruk nanon ma'ri mekkot nan appik nuthuk. ⁷ Capu ncik appik cakann'ranon anaruk c'rarin akka mperethe lon ila ul waik wakkot nocapu lokithak. ⁸ Ngkonon nokamuthe. Mparthuk paik pakanneo noka-muthe akka naun ca'ri cin icekkot nan carthuk anthan." ⁹ Anakka kwi'rethekin lon elli akwikkat cik noththok poCelil.

OIeccuo pae nokamuthe koMü'rük

¹⁰ Anakka opangon theot nokamuthe, oIeccuo poingkathe nokamuthe cakuruk nthu'ran.

¹¹ Noca'ri cokamuthe ul woIouth wokot cik akwancathok aipitto itti, "Pul emp're paik kartha?"

¹² Ul wokot cik aerethok, opilingon thokat akin i're itti "Ook pul ipoporot." Opilingon thothiatherit itti, "Aa, kwammikkot ul."

¹³ Anaruk pul pellat ipi'rethe lon tokit koul mpo're cittan akka okin thokat akin opellene ul woIouth ionu lon ikkun.

¹⁴ Anakka kamuthe kokat ere kamattat p'rin aIeccuo i'rikat ith'rapak thonoppan toKapik akwikkat cik akwongkene. ¹⁵ Ul woIouth woprtakatherit aikkat cik aipitto itti, "Pul empi piothe thinaik enthi kartha appakannongkenetta?"

¹⁶ AIeccuo othiat tit itti, "Thongkene thin thakannoka thin thaat nakkwi ipothiiothin.

¹⁷ Amma okkwi ipongothe itti kwakkot lon ila Kapik kongothe, kwina itti thongkene enthi thaat noKapik ana manna okkorronno oka naun ana noun. ¹⁸ Okkwi iperet lon loka kung, kwaik pakwantinthe ka kung thothiakine cik, anaruk okkwi iparekine thoporot thokkwi ipothiiothok,

lon lung loco'rotheik lella karrarit. ¹⁹ OMucca pakannethet non lon lothonce'ret lon ciki? Ana icci pul pella nti ianon ipoccoke the itti kwareko ngngin, ngintha akka onon thonganthe itti nthakkwinthin?"

²⁰ Aul omekathok itti, "Ngkwonu u'rupa iokithak, oththa akkongothe itti kwakkwohung?"

²¹ Aieccuo i'rekat kin itti, "Mpokkothe lon lulukku ilommaththik ana onon thoprttakatherit appik. ²² Icci oMucca ponanet non lon lothokekkot ana antoka manna itti ook akkakanonona anaruk thiki thon ana onon thokekkiethe nyukul nyon noca'ri caCcepith. ²³ Inenni amma ul wonu itti wakekkiettat noca'ri caCcepith othakka itti alon lothonce'ret lon cik loMucca angutat onon thontha akka annua ka kin nothothikkie pul poporot noca'ri caCcepith? ²⁴ Nokorronno akkma pul ipa nthimmat tulluk, nakkma pul llon ilaik icat ana loco'rotheik."

Oieccuo paMicciei?

²⁵ Ana nolon len ul w'rek wonoka'ran koU-rucelim wikkatheik aipitto itti, "Okoronnoka pul empi ipakin thaik thakwancot itti okin thakkwori? ²⁶ Kwaik pere ncinokkit ana okin thaik thakanni'rethok lon l'rek. Nili nina nan icat itti ook oMicciei? ²⁷ Anaruk onin thina itti pul empi pokeren, akka amma oMiccie anthan pul pella pina itti ook pokeren."

²⁸ Ittina oieccuo pikkatheik akwongkene icci noppa toKapik akwi'rekat itti, "Ii onon thina ana onon thina itti oun pokeren. Mpakannoka cene akka mpongothe itti mpaka cene ngka kin

anaruk okkwi ipothiöthin paik icat ana onon thommak ²⁹ anaruk mpinak akka mpaat naak ana kwothiöthin.”

³⁰ Ittina akin enekkekat itti okin thaccokothok, anaruk pul pellat iponekkethe ukun naak akka ca'ri cung cokat carthuk. ³¹ Ana icci ul wokwat cik woppot ioccoke the lon lung nomiküt men ana wi'rekathē itti, “Amma oMiccie akkaat kwakkot lon ilommaththik loppot nnopul empīi?”

³² Aul woPriccin occikat aul erethok llon elli. Ittina ul ittittik woul wonoppān toKapik ana ul woPriccin othiat ul iangwot tupan toKapik athocokothok.

³³ OIeccuo pi'rekathē itti, “Oron thakaik oron aththut ma'ri motte ana mpaine okkwi ipothiöthin. ³⁴ Onon thakwariccathin anaruk onon thakanniothin ana na mpaik onon thakan-nanthan.”

³⁵ Aul woIouth erettaranthet itti, “Pul empi pongothē itti paeo kartha othakka itti aron okorronno iothok? Kwaeo na ul wonnon iopettakothēik iul iakannoka ul woIouthi akwothongkene ul iakannoka woIouthi?”

³⁶ Kwappongothē itti kwi're itti kaththa akka kwi'ret itti, ‘Onon thakwariccathin ana onon thakanniothin’ ana ‘Na mpaik onon thakannanthan?’”

Nue noi'ri ngothikkoik

³⁷ Ana noca'ri icirik ica kamuthe kocothakothē nan, oIeccuo purokathē akwi'rekat lon mpo're cittan itti, “Okkwi ipa pica paik pakkwot akwainin akwathikko ng'ri. ³⁸ Okkwi ipocokothē lon lin nociküt cung nue noi'ri ngothikkoik nallo

nti iaak ammakka atham wi'ret.” ³⁹ Kwokat cik akweret Kanang koKapik ikakin athocco ithoc-cokothe lon lung nomikit. Kanang koKapik kokat karthuk ettat kin akka oIeccuo pokat parthuk pakannotthikkietta priik.

⁴⁰ Anakka ul woccikothe lon lung, w'rek wi'rekathe itti, “İcat pul empi papul pothernte lon loKapik.”

⁴¹ A'rek i'rekat itti, “Ook oMiccie.”

Ana icci apilingon ipittat itti, “OMiccie panthan noththok poCelil taththa?” ⁴² Atham wakinni're itti oMiccie panthan noul woThauthi ana noka'ran koPeththelami na Thauth pikkot ciki?” ⁴³ Ul willillakatherit nti ilon loIeccuo ⁴⁴ opilingon thokat thongothe itti okin thac-cokothok anaruk pul pellat iponekkethe ukun naak.

Ul woIouth ittittik wakonnocokot lon nomikit

⁴⁵ Ul iangwot tupan toKapik wopakkanthet ul ittittik woul wonoppan toKapik ana ul woPriccin ithipittothekin itti, “Onon thontha akka onon thakannonakok cene?”

⁴⁶ Aul iangwot cik i'rekat itti, “Pul pella iperet kirrkkir ammakka pul empi ere.”

⁴⁷ Aul woPriccin othiät tit itti, “Kwammikkothenon cakuruki?” ⁴⁸ Onon thimmat itti opilin nti inili ana manna ul woPriccin poccoke the lon lung nocikiri? ⁴⁹ Aa, pul pella anaruk ul enni wattattakot akka womma lon lothonce'ret lon cik loMucca.

⁵⁰ ONikkothemoc ipokat poinet oIeccuo ana ipokat poul woPriccin pipittot itti, ⁵¹ “Lon

lothonce'ret lon cik lakkma pul kappaki apparthuk inako lon lung ila kwokkothei?"

⁵² Okin thothianthok tit itti, "Ngkwonoththok poCelil cakuruki? Okatha iatham ana ngkwathiot itti pul pothernte lon loKapik pella panthan noththok poCelil." ⁵³ Ittina okin thopet-takatheik kurekkurek oince ikaman ken.

8

Pul ipopari poccokittathe apa'ro mpul

¹ Anaruk oIeccuo poingkathe noco'rong co-Ceththun. ² Ana ngi'rimak ngorrot ngen kwappropakkat noppa toKapik ana ul appik wakkakanthok akwikkat cik itho'rküt then ana kwikkatheik akwongkenekin. ³ Aul iangkene lon lothonce'ret lon cik ana ul woPriccin onakat pul ipopari noppa poccokittathe mpul ipocura akin a'ro ana okin thocerekathe pul ipopari toküt koIeccuo ana toküt koul. ⁴ Akin i'rekat oIeccuo itti, "Pul ipangkene, pul ipopari empi poccokittathe apa'ro mpul ipocura. ⁵ Lon lothonce'ret lon cik loMucca li'ret itti pul amakka empi pakincakot cik mmothok, ngkwi're taththa?" ⁶ Okin thokat akin ipittot oIeccuo lon elli othakka itti akin i'rak ana akin iot kathar ikakin orukwethok ngngin. Anaruk oIeccuo pocukkwatheik nocapu akwikkat cik akwakuroik nocapu ncaun. ⁷ Anakka okin thokat cik akin ommiek nthipitto lon, kwoco'rathe kapik akwi'rekat kin itti, "Amma opilin ntianon pella lon cik ilokithak akwo'ro pul ipopari empi cit-toküt mpothok." ⁸ Akwappocukkwat cik attang akwokurro nocapu.

⁹ Ana okkwion ithoccikothē lon ila oIeccuo pi'ret okin thoincekathe thuluththuluk, ul iukkwat cottokit apilingon antomakot puccuk mono aIeccuo okwentakat pellek okin opul ipopari pen apoco'ro cīnang. ¹⁰ OIeccuo poco'rathe kapik ana kwi'rekathe pul ipopari itti, "Okin thartha? Pella ipakkmarungi?"

¹¹ Apul ipopari othiāt tit itti, "Aa pul pella, pīt pin."

AIeccuo i'rekathok itti, "Mpakannakkmang ngko apa'rine thikkoik ithokithak cik."

OIeccuo k'ran kocapu ncik appik

¹² Ana oIeccuo pappererekanthet ul attang akwi'rekat kin itti, "Oun k'ran ikimmie capu cik appik. Okkwi ipamakothin kwakannon-yaro i'rimak ana kwana k'ran ikimmie cik kothikkoik."

¹³ Aul woPriccin i'rekathok itti, "Ngkwaik peret thoka kang ana theret thoka kang enthrik thakannoka icat."

¹⁴ AIeccuo othiāt tit itti, "Antoka manna itti mpaik peret thoka kin ana ila mpaik peret ka kin ngngin laik icat akka mpina na mpaat ngngin ana na mpaik paeo. Anaruk onon thomma na mpaat ngngin ana na mpaik paeo. ¹⁵ Onon thakkma ul ngkathar ikaul ionyi akkma ngngin anaruk mpakannakkma ul. ¹⁶ Anaruk amma mpakkma, thakkma thin thoco'rotheik akka mpakannoka prek nore engi, onin thaik inongappa okkwi ipothiothin. ¹⁷ Ilon lothonce'ret lon cik lon lokurrakot itti amma ul we'ra werethe nolon ana theret then thaka icat.

18 Mperet nolon loka kin pellek, pul p'rek iperet nolon loka kin ook ongappa okkwi ipothiöthin.”

19 Ittina akin ipittathok itti, “Oththe paik kartha?”

Aleccuo othianthet kin tit itti, “Onon thomman ana manna ongappa, amma onon thaththinan, onon thainat ongappa cakuruk.” 20 Kweret lon elli akka kwokat cik akwongkene noppan toKapik iccik koka'ran kotha'rntot akucci ia'rntakinthet ngre ngonoppa toKapik. Pul pellat ipa'rumothok itti paccokothok akka ca'ri cung cokat carthuk.

21 Aleccuo appi'rekat kin attang itti, “Mpaik paeo ana onon thakwariccathin, ana onon thillet ilon lon ilokithak. Ana na aneo onon thakannao noka'ran ken.”

22 Elli lokorronnathe ul woIouth aipitto itti, “Kwakkwot ka kungi? Ilen akka akwi'rene itti, na aneo, onon thakannao noka'ran keni?”

23 Anaruk kwo'rungkathe nolon akwi're itti, “Onon thonocapu thaiken ana oun porothi'rot. Onon thonocapu enci. Anaruk mpakannoka ponocapu enci. 24 Mpi'rethenon itti onon thillet ilon lon ilokithak amma onon thakannocokot lon nomikit itti oun okkwi ipa mpaik pi're itti oun, onon thillet ilon lon ilokithak kirrkkir.”

25 Okin thipittathok itti, “Oung oththa?”

Aleccuo othianthet kin itti, “Oun pul ipa mpi'rethenon nci nomun itti mpaka. 26 Mponu loppot ila anerenenon nothakkma non. Anaruk okkwi ipothiöthin akki're lon ilaik icat ana ila mpocckithe naak mperene ul nocapu ncik appik.”

²⁷ Okin thaththakannina itti kwokat cik akwerenthet kin oththan pung. ²⁸ Ittina aIeccuo i'rekat kin itti, "Ca'ri icanon okkwot ukul wopul iponyi mono onthot nothapak, onon thina itti oun okkwi ipa ani're itti oun ana mpakannokkot lon l'rek pellek anaruk mpaik pere tulluk ila ongappa pongkenerin. ²⁹ Okkwi ipothiothin paik naun, kwakorronno okorronnonon thellek, akka mpakettet lon ilapiriek noka appinappin." ³⁰ Anakka kweret lon elli, ul woppot woccokathe lon lung nomikit.

Nyukul nyAprein

³¹ Aieccuo i'rekat ul woIouth ioccoke the lon lung nomikit itti, "Amma onon tho'rungkwothe ithongkene thin, onon thaka ul icaricat iammakothin. ³² Ana onon thina lon ilaik icat ana lon ilaik icat lelikko non nti ilon ilokithak."

³³ Okin thothianthet oIeccuo tit itti, "Onin thathiki thAprein ana onin thokat thakorronno oka iak wopilin. Ana tat akka ai're itti onin thelikkako?"

³⁴ Aieccuo othianthet kin tit itti, "Mpi'ret non ilaik icat itti okkwi ipakkot lon ilokithak kwapiak polon ilokithak. ³⁵ Iak wonu ka'ran cik iku'ri okorronno oka kothupuththuput, anaruk ukul wonu a'ran cik iku'ri wothupuththuput. ³⁶ Ittina amma ukul woKapik welikkot non ana onon thelikkako kirrkir. ³⁷ Mpina itti onon thathiki thAprein, anaruk onon thaik thakwantot kathar ikanon okkwothin ngngin akka lon lin lella ka'ran nomikit mon. ³⁸ Mpaik perenenon lon ila ongappa pokenerin ana onon thakkot ilanon thocckithe naththen."

³⁹ Akin othiät tit itti, “Ongappa pîn Aprein.”

Aleccuo i'rekat kin itti, “Amma onon akkakkokat nyukul nyAprein, onon thaakkothe lon ammakka Aprein pokkothe. ⁴⁰ Ammakka lon laik onon thongothe itti nthakkwothin, pul iperenet non lon ilaik icat ila mpoccikothe noKapik. Aprein pakannokkot lon ammakka lon elli. ⁴¹ Onon thaik thakkot lon ila oththen thokkettethe.”

Akin othianthok tit itti, “Onin thakorronno oka nyukul nyorittak, ongappa pîn pulukku ook Kapik ngka kung.”

⁴² OIeccuo pi'rekathekin itti, “Amma Kapik kokat oththe pon, onon thira thangathin akka mpaat noKapik ana mpei cene. Mpakannao ngkathar kin, anaruk kwothiothin. ⁴³ Ngintha akka onon thommanet occikinthe lon lin ila mpaik pere? Laik ittina akka onon thakorronno okkwine lon lin kunu ncik. ⁴⁴ Oththe pon pul pothopulut ana nthongothe itti onon thamakot lon ila oththe pon pongothe. Kwokat pul ipangutte ul ncima'rot ana kwonat karra ana kwappokat p'rat lon ilaik icat akka kwellat lon ilaik icat nocikit. Amma akwammikkot, kwere lon lulluk loka kung ana ook pokarra ana ook oththan poul iere karra appik. ⁴⁵ Anaruk akka mperenenon lon ilaik icat ana ilen akka onon th'rat occokinthe lon lin ila mpaik pere. ⁴⁶ Oththa ntianon akkakenen itti mponu lon lokithak? Amma mpaik perenenon lon ilaik icat, ngintha akka annokorronno occokinthe lon nomikit? ⁴⁷ Okkwi iponu oththan paKapik kwaccikot lon ila Kapik i're. Lon ilakorronnonon

annokorronno occikinthet lon lin itti akka onon thakannoka thoKapik.”

Oieccuo akkrük nAprein

⁴⁸ Aul woIouth i'rekat oieccuo itti, “Lon lin lakannoka icat itti ngkwonoul woCcamirin ana ngkwannoka pin ana ngkwonu u'rupa iokithaki?”

⁴⁹ Aieccuo i'rekat kin itti, “Mpella u'rupa iokithak anaruk mpothianet ongappa cik ana onon thakorronno othianok cik. ⁵⁰ Mpaik pakorronno okwantinthe ka kin thrik anaruk opilin paik pakwantinthe ana ook okkwi ipa athakkma. ⁵¹ Mpi'ret non ilaik icat itti okkwi ipo'rumot nolon lin, kwakannio aththik.”

⁵² Menik aul woIouth i'rekat itti, “Onin thant-rina p'rin itti ngkwonu u'rupa iokithak. Aprein piot ana ul wothernte lon loKapik willet cakuruk. Ana tat akka ai're itti pul ipaccikot lon lang pannio aththik? ⁵³ Oung akkrük nangappa pin Apreini? Kwiot ana ul wothernte lon loKapik cakuruk willet. Ngkwaik pame itti oung oththa?”

⁵⁴ Aieccuo i'rekat kin itti, “Amma mpaik pathikkie ka kin prik, lon len lella lon cik. Ongappa ipanon thaik thi're itti ook oththe pon ook ipathikkien prik. ⁵⁵ Onon thommak anaruk mpinak. Ana amma mpi'ret itti mpommak, mpaka ponu karra karkkon anaruk mpinak ana mpo'rumot nolon lung. ⁵⁶ Oththe pon Aprein popirakathe noka akka nothokwarttikot ca'ri cothao thin akka kwimmat akwopirakat noka. Kwimmakathe ma'ri mothanthan min ana kwopirakathe noka.”

⁵⁷ Aul woIouth i'rekathok itti, “Ngkwarthuk manna okkot luput arrial we'ra ana alkaire (50), ana ngkwi're itti ngkwimmat Aprein taththa?”

⁵⁸ Aleccuo othianthet kin tit itti, “Mpi'ret non ilaik icat, mpokat cik Aprein parthuk akwonta.”

⁵⁹ Menik aul ocumat mothok itti wakincok, anaruk kurakathekin akwopa'rat cik noppa toKapik.

9

Oleccuo pimie pul cik ipokwontat pi'rimathe

¹ Anakka oleccuo pokat cik nokathar, kwim-makathe pul pi'rimathe ammakka pokwontat nti icarak connan. ² Aul iammakothok ipittathok itti, “Pul ipangkene, oththa akkokkothe lon ilokithak mono apul empi okwontakanthet pi'rimathe? Ooki ana amma okorronno oka ook oththangoni?”

³ Aleccuo othianthet kin tit itti, “Okorronno oka oththangon ana manna okorronno oka pul pen akkokkothe lon lokithak, anaruk elli lothakkat ittina othakka itti angre ngoKapik im-makot ithikkoik thung. ⁴ Inakka cingki carthuk orungko, oron thonu itti oron thakkot ngre ngokkwi ipothiöthin. Ngko'ra ngaik ngao ana pul pella ipareko ingko'ra. ⁵ Ana inakka mpaik nocapu, oun k'ran ikaccie cik nocapu appik.”

⁶ Manakka oleccuo pi'ret lon elli, kwothukkwathe nguk nocapu ana kwoukkwathe nonunthu ana kwothathe pul ipi'rimathe ikit.

⁷ Kwi'rekathe pul pen itti, “Ngko, athilakko ikit ik'ral ikocot k'ran itti Ciluam” (ilonu itti 'thothiöt'). Ana pul poingkathe ana

paththilakkat ana pakkakathe tuan appimmat cik.

⁸ Ul wonocürük cung ana okkwion ithokat akin okathaccecek akka akwipittittot ul a'rupu, wikkatheik aprttakot tit ana aipittarot itti, "An-noka pul empi ipokat cik apipittitto a'rupu ikathari?" ⁹ Ul w'rek wi'rekathe itti ook pul pen ipokat ipi'rimathe. Ana a'rek i're itti, "Okorronno oka ook kungkworok nuthuk."

Anaruk kwi'rekathe ul itti, "Oun ipokat pi'rimathe."

¹⁰ Okin thipittathok itti, "Ngkwimmat cik taththa?"

¹¹ Kwothianthet kin tit itti, "Pul p'rek poc-cot k'ran itti oIeccuo poukkwot ngacok ana kwothathin ikit. Ana kwi'rekathin itti ngko athilakko toca ik'ral koCiluam. Ana mpoingkathe ana mpaththilakkat toca ana mpimakatheik."

¹² Ana okin thipittathok itti, "Pul pen paik kartha?"

Ana kwi'rekathekin itti, "Mpomma na kwaik."

¹³ Okin thonakanthet ul woPriccin pul ipokat pi'rimathe. ¹⁴ Ca'ri ica oIeccuo poukkwot nunthu nan ana anyinthet pul ipokat pi'rimathe kit cokat caCcepith. ¹⁵ Ana ul woPriccin wipittathok cakuruk itti kwimmat cik tat, ana pul ipokat pi'rimathe pothianthet kin tit itti, "Kwothothin ngacok ikit ana mpaththilakkat ana mpim-makatheik ina."

¹⁶ Aul w'rek woPriccin i'rekat itti, "Pul empi paKapik akkakorronno othiöt akka pakorronno o'rumo nolon lothonce'ret lon cik loca'ri caCcep-ith." Anaruk a'rek wi'rekathe itti, "Pul polon

ilokithak pakkot lon elli ilommaththik taththa?" Ittina okin onakathe lon le'rarit.

¹⁷ Ittina p'r'in akin appopakkanthet pul ipokat pi'rimathe akin ipittathok itti, "Ngkwi're itti oththa akka akkanyinthung kit? Kit kang akka kwanyothe."

Apul othianthet kin tit itti, "Ook pul pothernte lon loKapik."

¹⁸ Anaruk ul ittittik woIouth wokat w'rat angkot lon itti pul empi pokat pi'rimathe ana pimmat cik akin akkaro oththan ana onnan kappak. ¹⁹ Akka oththan ana onnan thaat akin ipittat kin itti, "Ukul won enni? Ien enni ianon thi'ret itti wokwontat wi'rimathe? Ana tat akka wei wimmat cik inenni?"

²⁰ Aththan ana onnan popul ipi'rimathe othianthet kin tit itti, "Onin thina itti ook ukul win ana wokwontat wi'rimathe. ²¹ Anaruk onin thomma tat akka kwimmat cik, ana manna onin thomma okkwi ipimmierok cik, nipit-tothok, kwocokkat ana kwina ere lon loka kung." ²² Oththangon thaththi'ret lon elli akka okin thokat cik akin opellene ul woIouth akka wonekkethe lon cik itti okkwi ipi'ret itti oIeccuo ook oMiccie kwapa'rettaik nocuththun ca'rama. ²³ Ana ilen akka oththangon thi'renet itti, "Kwocokkat nipittothok."

²⁴ Aul ittittik woIouth appakkarat pul pen ipi'rimathe akin i'rekathok itti, "T'rethenin tokit koKapik ikr'ik itti ngkwi're lon ilaik icat. Akka onin thina itti pul ipimmierung cik polon ilokithak."

²⁵ Apul othiat tit itti, "Mpomma amma ook polon ilokithak ana manna itti kwannoka polon

ilokithak, lulukku ila mpina tulluk itti mpokat pi'rimathe anaruk inenni mpimmat cik.”

²⁶ Aul ittittik woIouth ipittathok itti, “Ngintha akka kwokkinthung? Ana tat akka kwim-mierung cik?”

²⁷ Akwothianthet kin tit itti, “Mpi'rethenon ntit akkumman ana onon th'rat occikot. Ngintha akka annappipittine itti nthappocikot? Nthongothe itti onon thathakka ul iammakothok cakuruki?”

²⁸ Ana ul woIouth wocungkwathok ana wi'rekathe itti, “Oung pul pung ipamakothon, anaruk onin thaul iammakot oMucca. ²⁹ Onin thina kicce itti Kapik kernet oMucca, anaruk onin thomma manna na pul empi paat ngngin.”

³⁰ Apul ipokat pi'rimathe i'rekat kin itti, “Lon lon lointha ellrik, onon thomma na kwaan ngngin anaruk kwanyinthin kit. ³¹ Oron thina itti Kapik kakannocikot ul wolon ilokithak. Anaruk kaccikot ul iongothe lon lung ana iakkot lon ila kwongothe. ³² Ammakka capu coku'rettat ncik pul pella manna ipocikothe itti pul panyittan-thet kit ipokwontat pi'rimathe. ³³ Amma pul empi pappakannoka poKapik pakannokkothel lon elli.”

³⁴ Aul woIouth ittittik i'rekat pul ipokat pi'rimathe itti, “Ngkwokwonttat ana upokkot ilon ilokithak, ngkwonu itti ngkwangkenenin lon l'reki?” Okin thokiccekathok nnocuththun kirrkir.

³⁵ Ana oIeccuo pocikathe itti okin thokiccerok nnocuththun anakka kwiothok,

kwi'rekathok itti, “Ngkwaccokot lon nocik̄it lokkul wopul iponyii?”

³⁶ Apul ipokat pi'rimathe ipittathok itti, “Ook oththa p̄it pin, i'rethin othakka itti anocokot lon lung nocik̄it.”

³⁷ Aieccuo i'rekathok itti, “Ngkwimmarok ntit ana kwaik perenung.”

³⁸ Ittina apul pen i'rekat itti, “Ili, mpocokothe lon lang nocik̄it.” Ana kwa'rakanthet oieccuo nga'rama.

³⁹ Oieccuo pi'rekathe itti, “Mpaat nocapu appik anathakma ul, othakka itti aul i'rimathe im-
maik ana ul immat cik ai'rimat.”

⁴⁰ Ul w'rek woPriccin iokat cik okin aththut wocik̄ithe akka kwi'ret lon len, aipittat itti, “Ngimpene? Onin thi'rimathe cakuruke?”

⁴¹ Aieccuo othianthet kin tit itti, “Amma onon thaththi'rimathe, onon thakorronno okat tholon ilokithak. Anaruk onon thaik thinnikot itti onon thimmat cik ittina lon ilokithak la'rungkotheik.”

10

Pul ipu're ana a'rupu wung worua

¹ Aieccuo i'rekat itti, “Mpi'ret non lon ilaik ic̄at, pul ipanni'riko nti ic̄ur̄uk cokuthuk, akwullo karrang, okkathu'ran empr̄ik ana pul ipaththikot a'rupu. ² Pul ipi'riko nti ic̄ur̄uk cokuthuk, ook opit polungkat. ³ Ana pul ipangwot cik panyinok kathat ana lungkat laccikot po're pung. Kwakkaro lungkat lung nn'ran wen akwoppiekat thapat. ⁴ Ana amma kwoppiethe thapat nti iththuk, kwaeo tokit ken alantomakothok ana laccikothok akka lina po're

pung. ⁵ Anaruk lakorronno omakot pul ipa lomma, ana lallot pul pen akka lomma po're popul pen." ⁶ OIeccuo perenet kin lon elli okkwie lon kuru ncik anaruk okin thannina lon ila kwokat cik akwerenekin.

⁷ Ittina aIeccuo appi'rekat kin itti, "Mpi'ret non lon ilaik icat, Oun cürük cokuthuk na lungkat okko. ⁸ Okin appik ithaat amparthuk ao akin innikot itti okin ul iu're, okin thothu'ran ana ithaththikot a'rupu anaruk lungkat lakorronno occikot kin. ⁹ Oun cürük ana okkwi ipokkot icürük cen kwa'rettat. Kwi'riko noppa ana oppot thapat akwoppo icürük ana kwiot thu'rit. ¹⁰ Pul iponu thu'ran pao tulluk itti pathomunye ana ongwaro ana okittoik anaruk mpaat itti akin ona thikkoik thonu thethiättat.

¹¹ Oun pul ipu're ipoporot. Pul ipu're ipoporot pangat itti pio nti ilon lolungkat lung. ¹² Pul iponakattat itti pu're pakannoka ammakka opit polungkat akka amma pul pen pimmat mipa amanthan ana papa'rine lungkat cik ana pallo ana mipa mallot tolungkat amo'rumat amopettat cik. ¹³ Pul pen pallo akka kwakannoka pul polungkat ana kwella kit ken.

¹⁴ Oun pul ipu're ipoporot, mpina lungkat lin ana lungkat lin linan cakuruk ¹⁵ ammakka ongappa pinan ana mpina ongappa ana mpio nti ilon lolungkat lin. ¹⁶ Mponu lungkat l'rek lella ilakorronno oka nti iththuk kolungkat elli. Mponu itti mpanakin cakuruk. Laccikothin ana laka ithun iththuk kulukku ana pul ipu're paka pulukku. ¹⁷ Ongappa pongothin akka mpangkothe itti mpio anappuroko attang. ¹⁸ Pul

pella panekothin thikkoik thin anaruk oun pellek ngka kin akkongothe itti mpio. Oun akkonu pu'ran itti mpakorronno ka kin itti mpio ana mponu pu'ran itti mpurokie ka kin nti ithio. Lon ila mpaik pere langappa akki'rethin itti mpakkot."

¹⁹ Anakka kwi'ret lon elli aul woIouth ap-pillillakat tit attang. ²⁰ Ul woppot nti iakin wi'rekathe itti, "U'rupa iokithak wo'rot naak ana kwipot purrut. Ngintha akka aron occikinthet lon lung?"

²¹ Anaruk ul w'rek wi'rekathe itti, "There thung enthi thakannoka thopul ipa u'rupa iokithak wo'rot nan. U'rupa iokithak wanyot kit kopul ipi'rimathei?"

Ul woIouth w'rat oIeccuo

²² Ittina aca'ri cokamuthe kothothuntet tupan toKapik akkakat noka'ran koUruccelim. Ana cik cokat icpo, ²³ oIeccuo pokat cik akwon-yaro ith'rapak tonoppa toKapik ithrara ithonat k'ran itti Thrara thoCiliman. ²⁴ Ul woIouth wa'rntakathe iccik kung ai're itti, "Ngkwaprt-takiet nin tit manna kartha? Amma oung oMiccie ai'ret nin nci nokkit."

²⁵ Aleccuo othianthet kin itti, "Mpi'rethenon, anaruk onon thakorronno occokot lon lin nomikit. Lon ilommaththik ila anokkot ngk'ran kongappa leret lon lin. ²⁶ Anaruk onon thakan-nocokot lon lin nomikit akka onon thakannoka lungkat lin. ²⁷ Lungkat lin laccikot po're pin ana mpina ana linan ana lammakothin. ²⁸ Mpethet kin thikkoik thothupuththuput ana okin thakorronno intat cik ana pul pella panekothin kin.

29 Ongappa ipethin kin akkirik na'rupu appik, ana pul pella ipaneko kin ntikkun wongappa.

30 Oun ana ongappa onin thulukku."

31 Aul woIouth apponekat mothok attang itti wakincothok cik. 32 Anaruk oIeccuo pi'rekathekin itti, "Mpokenet non lon loppot ilommaththik nangappa, liatha akka onon thongothe itti nthakincothin cik ntit?"

33 Aul woIouth othianthok tit itti, "Onin thakorronno angkot itti onin thakincothung cik nti ire ioppot ia ngkwokkothe anaruk akka ngkwaik pakatha ka kang ngkwaKapik anaruk ngkwapul iponyi."

34 OIeccuo pothianthet kin tit itti, "Lakorronno okurrako ilon lothonce'ret lon cik lon na Kapik ki'rethe itti, 'Ul ionu lon ikkun w'rek itti onon apik'? 35 Lon loKapik lakkarot ul wen itti apik ana lon loKapik laik icat appinappin. 36 Oun ipa angappa pakkarot ana othiot nocapu ncik appik, ana tat akka annorukwethin llon itti mpi'ret itti, 'MpaKapik'? Othakka itti akka mpi'ret itti, 'Oun ukul woKapiki'? 37 Amma mpaik pakorronno okkot ngre ngongappa annokorronno occokot lon lin nomikit mon. 38 Anaruk amma mpaik pakkot ana manna onon thantokorronno occokot nomikit mon, noccokot lon ilommaththik l'rek ilanon thina itti ongappa paik iaun ana mpaik iaak." 39 Menik okin thenekkekathe itti okin thaccokot oIeccuo anaruk kurakathekin akwoingkat.

40 Ittina oIeccuo parrathe tue toÜrÜthün cik akweo noka'ran na aIuanna pomamuthie pokat cik

akwikket ul mamuthie noma'ri morokit. OIec-cuo pikkot cik nan ⁴¹ ana ul woppot wakkakan-thok. Okin thi'rekathe itti, "OIuanna poma-muthie pakorronno okkot lon ilommaththik, anaruk lon ila kwerethe pul empi ngngin lokat icat appik." ⁴² Ana ul woppot woccokathe lon loIeccuo nomikit.

11

Thio thoLiaccir

¹ Pul p'rek pokat cik poccot k'ran itti oLiaccir. Pokat pongo ana kwokat ponoka'ran koPeththania ipokat ka'ran koMeriom ana opang ipopari oMarththa. ² OMeriom ipa apang oLiaccir paik nonthe pongo ook oMeriom ipo'rot Ili amutha ana ukukkwot tacok tolli nuan wung. ³ Ittina apangon thoLiaccir othianthet oIeccuo thon itti, "Ili, okkwi ipa ngkwongothe pongo."

⁴ Anakka oIeccuo poccikothe elli akwi'rekat itti, "Thonga enthi thakorronno ocothakot itti kwio. Anaruk othakka itti aKapik othikki-etta krik ana athrik aine ukul wung nti ithio then." ⁵ OIeccuo pokat pongothe oMarththa ana opang ipopari ana opang pen ipocura oLiaccir. ⁶ Anakka oIeccuo poccikothe itti oLiaccir pongo, kwapprikkat cik noka'ran na kwokat ma'ri me'ra icci.

⁷ Menik kwi'rekathe ul iammakothok itti, "Ntun eo opakot noththok poIouthia."

⁸ Anaruk okin thi'rekathe itti, "Pul ipangkene, onin thapri itti ul woIouth wira wakincothung cik tentre ana ngkwappopakkinthet kin tat?"

⁹ Aleccuo othiat tit itti, “Mpapri itti ca'ri conu kit komingkirit attul ana ikken ke'ra? Ittina okkwi ipanyaro icingki kwakorronno ommukko nopothon akka kwimmaik ngk'ran kocingki conocapu. ¹⁰ Anaruk amma akwonyaro ngko'ra kwammukko akka k'ran ikaccienok cik kella.”

¹¹ Akka oIeccuo pi'ret elli, akwapparttat nan itti, “Opuruko ponnon oLiaccir pakko inthe anaruk mpaik paeo anothurttok.”

¹² Aul iammakothok i'rekathok itti, “Ili, amma kwaik inthe ana kurtta.” ¹³ OIeccuo pappokat akwere itti oLiaccir piot anaruk ul immakothok wokat wommat akin ome itti kwakko inthe nuthuk.

¹⁴ Ittina kwi'rekathekin nci nokkit itti, “OLiaccir piot, ¹⁵ ana nti ilon lon mpopirat noka akka mpellat tentre naak othakka itti annocokot lon nomikit. Ntrun oinok.”

¹⁶ OThthoma ipokat poccot k'ran cakuruk itti Tharo i'rekat ul woIeccuo iammakothok w'rek itti, “Ntun eo cakuruk othakka itti aron othille uraththut.”

OIeccuo pakkie ul cik

¹⁷ Anakka oIeccuo paat, kwaththiat oLiaccir akkwiot ntit akkwonu ma'ri moco'rin ippu.

¹⁸ Ka'ran koPeththania kokat kannoka ciththan noka'ran koUrucelim, ¹⁹ ul woppot woLouth wawoinet oMarththa okin opang oMeriom athipitto kin akka opang pen pokat piot. ²⁰ Anakka oMarththa pockithe itti oIeccuo paik panthan, kwoingkathe thapat akwothocurot iaak, anaruk oMeriom pikkatheik tuan.

²¹ AMarththa i'rekat oIeccuo itti, “Ili, amma ngkwappokat cik cene ana opangkin pannaiot.

22 Anaruk mpina itti manna inenni Kapik kethung ilaipitto.”

23 Aieccuo i'rekat oMarththa itti, “Opangkang puroko attang.”

24 Amarththa othiat tit itti, “Mpina itti kuroko attang noca'ri cothurtuko.”

25 Aieccuo i'rekathok itti, “Oun thuroko ana thikkoik. Ana okkwi ipoccoke lon lin nocikit kwakkoik antoka manna itti kwiot, 26 ana okkwi ipaik ngkit thapat ana kwoccoke lon lin nocikit kwakorronno io, ngkwaccokot lon elli nocikiri?”

27 Akwothianthet oieccuo tit itti, “Ili, mpoccoke lon nocikit itti, oung oMiccie, ukul woKapik okkwi ipokat ponu itti kwanthan nocapu ncik appik.”

28 Anakka kwi'rethe oieccuo lon elli akwoingkat akwothakkarat opang ipopari oMeriom thocipit. Akwi'rekathok itti, “Pul ipangkene paik cene ana kwaik pipittong.” 29 Manakka oMeriom pockoke lon elli akurokat kapik accokkot akwoingkanthok. 30 Oieccuo pokat parthuk i'riko icarak coman kwokat noka'ran na aMarththa paththocurot iaak. 31 Anakka ul woIouth iathipitto oMeriom wimmat tat akka kwurokot accokkot akweo thapat, okin thomakathok akin i're itti ikkre kwaik pathoot thoppu. 32 Manakka oMeriom peot noka'ran na oieccuo pokat cik, kwimmakathe oieccuo ana kwapathe iracok tung akwi'rekat itti, “Ili, amma ngkwappokat cik cene ana opangkin pannaiot.”

³³ Anakka oIeccuo pimmat oMeriom akwoo ana ul woIouth iaat akin aththut aoo cakuruk kwokakathe piccillang ka ana kwakorronno okakat poporot noka. ³⁴ AIeccuo ipittat itti, “Onon thocikkarorok kartha?”

Akin othianthet oleccuo tit itti, “Ili, a'rik athokatha.” ³⁵ Oleccuo pikkatheik akwoo. ³⁶ Ittina aul woIouth i'rekat itti, “Nantokatha akka kwongothok.” ³⁷ Anaruk opilin ntiakin pi'rekathē itti, “Okorronno oka ook ipanyinthet pul ipa pi'rimathe kīri, kwakannokorronnot oLiaccir itti kwakorronno ioi?”

Oleccuo purokie oLiaccir nti ithio

³⁸ Acikit ok'rellat oleccuo attang ana kwoingkathe thoppu thocu'rol ipa'ranthang. Tupu tokat tunukkakothe ngka'raccak. ³⁹ Kwi'rekathēkin itti, “Nopa're pothok cik.”

Anaruk oMarththa opang popul ipiot pi'rekathē itti, “Ili, kwiot ponu ma'ri moco'rin ana kwaththoka pakkunakot.”

⁴⁰ AIeccuo i'rekat itti, “Mpappakanni'ret non itti amma okkwi ipoccokothe lon loKapik nocikit ana kwimma thrik thoKapiki?” ⁴¹ Okin thopa'rekathē pothok cik aIeccuo okathakat tothi'rot akwi'rekat itti, “Ngappa, mpopiranung noka akka ngkwoccikothin. ⁴² Mpina itti ngkwaccikothin appinappin, anaruk mpi'ret elli othakka itti aul enni iaik waco'ro cene ina itti oung akkothiothin.” ⁴³ Anakka oleccuo pi'ret elli, kwakkarathe mpo're cittan itti, “Liaccir, oppothe thapat.” ⁴⁴ Apul ipappiot oppat thapat ana nyaun ana tacok tokat to'remethettat nneret wothocikkako ana kret kulukkwothok toca.

Oieccuo pi'rekathekin itti, "Nok'rothok eret akweo."

Ul woIouth wi'rikot lon itti wakkwot oIeccuo

⁴⁵ Ul woppot woIouth iaat itti wathokatha oMeriom anakka wimmat lon ila oIeccuo pokkothe, wocokathe lon lung nomikit men. ⁴⁶ Anaruk opilingon thoiŋkanthet ul woPriccin akin i'rekat kin lon ila oIeccuo pokkothe. ⁴⁷ Ittina aul ittittik woul wonoppan toKapik ana ul woPriccin thakkarante cuththun coul woIouth ittittik. Akin ipittat itti, "Ngintha akka oron okkot? Pul empi paik pakkot lon ilommaththik loppot. ⁴⁸ Amma oron thakorronnok akwokkot ittina ana ul appik waccokot lon lung nomikit, ana ul woRoma wanthan ana waneko tupan toKapik appik ana ul wonnon appik."

⁴⁹ Opilin nti iakin poccot k'ran itti oKiappa ook ipokat pul iprik ponoppan toKapik nothuput then pi'rekathe itti, "Onon thomma lon l'rek aththik. ⁵⁰ Onon thomma itti laka loporot itti pul pulukku pine ul woppot ana okorronno oka itti ul woppot wille, aintakat ciki?" ⁵¹ Kwakorronno i're elli ngka kung anaruk ammakka pul iprik ponoppan toKapik nothuput then perethe lon ilaik lanthan itti oIeccuo piot nothapak nti ilon loul woIouth, ⁵² ana okorronno oka tulluk itti kwine ul woIouth anaruk kwine nyukul inyopet-takotheik nyoKapik othakka itti akwa'rnttot kin tothun akwothikkiekin thulukku. ⁵³ Ana noca'ri cen anili noIouth ikkat cik anipot lon cik ilakin okkwot oIeccuo nggin.

⁵⁴ Oieccuo pikkatheik akwokorronno onyaro ncinokkit iul woIouth. Ana kwoingkathe

noka'ran koIppraim ikokat iccik koka kothampang ithonthomat ana kwikkatheik than okin oul iammakathok. ⁵⁵ Anakka ca'ri cokamuthe koul woIouth koThaurrot kaman k'rek cik kokat cik akokko napuththut, ul woppot wakkakathe noka'ran koUrucelime athimet lon len ilokithak cik akamuthe koThaurrot kaman k'rek karthuk ao. ⁵⁶ Okin thikkatheik akin akwariccat oIeccuo, anakka okin thoco'rot ith'rapak thonoppan toKapik okin thikkatheik akin ipittararot itti, "Atti kwanthan nokamuthe cung?" ⁵⁷ Anaruk ul ittittik woul wonoppan toKapik ana ul woPriccin wokat wonekkethe lon cik itti amma opilin piothe oIeccuo, akwathi'ret kin othakka itti akin athocokothok.

12

OIeccuo po'ruttat ngaak noka'ran koPeththania

¹ Anakka ma'ri mellat ncik m'rakkuruk akamuthe koThaurrot kaman k'rek cik okkattat, oIeccuo popakkathe noka'ran koPeththania na kwappurokiethe oLiaccir nti itho. ² Thu'rit thokkattakathe nti ithothiane oIeccuo cik athet-takathok aMarththa ikkat cik akwittarot kin ana oLiaccir pokat cik nti iakin ithokat akin othingkakot iriki wokkun wothokure iccik kung nokuppu'rung kothu'rit cakuruk. ³ Menik oMeriom ponekatho cu'ru camutha ionu cekerek crik ana kunanthe oIeccuo noracok ana kwikkatheik akukukkwot nnuan wung. Ana man moppakatho utha wamutha iakkunako iruk. Amutha wokat wokkattatho nnopo'ren ipoccot k'ran itti narth.

⁴ Apilin nti iul immakothok ipoccot k'ran itti oIoutha Icikkariuththi, ipathokerot ul oIeccuo pokat cik cakuruk akwi'rekat itti, ⁵ “Ngingtha akka aron okittintheet ngaak engi cik ingira ngaketta nakucci woppot aikkettat ul iaiak. Amutha wonu cekerek cakucci iarekako ngngnin thuput.” ⁶ Kwanni're lon elli othakka itti kwonu thiak thoul iaiak anaruk akka kwonat thu'ran ana kwokat pul ipoccoke the ka'ruk kakucci, ana kwokat akwomunye akucci iokat ika'ruk.

⁷ OIeccuo pi'rekathē itti, “Nokorronnok, kwap-pangwotheik itti akwathocikkon ngngin. ⁸ Onon thonu ul iaiak itho'rkit thon appinappin anaruk mpakorronno oka itho'rkit thon appinappin.”

Nili noul wonoppan toKapik ni'rikot lon itti nakkwot oLiaccir

⁹ Anakka ul woIouth winat nan itti oIeccuo pokat ceneket, woingkathe athokathak ana okorronno oka oIeccuo tulluk anaruk okin thaththokatha oLiaccir cakuruk ipa oIeccuo pap-purokiet nti ithio. ¹⁰ Ul ittittik woul wonoppan toKapik wipathe lon cik ila akin okkwot oLiaccir ngngin cakuruk, ¹¹ akka ook akkorronnot ul woIouth woppot apa'rīne lon loul wonoppan toKapik cik, accokot lon loIeccuo nomikit.

OIeccuo pi'riko Urucelim

¹² Ana ngorrot ngen, aul iaat nokamuthe occikat itti oIeccuo paik ikathar paik panthan noka'ran koUrucelim. ¹³ Okin thongathathe u'ri wokira kothemur akin oingkat othocurarot iaak akin i're mpo're cittan itti, “Ton opirane Kapik noka korothi'rot.”

“Athethiëta oka nakkwi ipaik panthan ngk'ran
kollì.”

“Athethiëta oka noili woIccereil.”

¹⁴ OIeccuo piathe nge'ringka ngotte ana kwar-
ratheran ammakka lokurrakot itti,

¹⁵ “Ul woIccereil, nokorronno ipo n're,
nantokatha ili won waik wanthan,
warrothe te'ringka iotte.”

¹⁶ Ca'ri cen ul iammakothok warommat lon
len, anaruk akka oIeccuo purokot nti ithio ana
othikkietta priik, akin antokwarikat lon ilokat
lokurrakot iatham woKapik ierethe lon lung ana
okin thokkanthok lon len.

¹⁷ Ana ul iokat cik okin aththe'ran akka
kwakkarot oLiaccir nti ippu akurokiekathok
nti ithio wikkatheik apettot lon len cik appik.

¹⁸ Ul woppot woingkathe athokathak akka wokat
wocikotho lon ila kwokkothe ilommaththik.

¹⁹ Ittina ul woPriccin werettaranthet itti, “Oron
thaik thakorronno okkot lon l'rek. Nantokatha
akka ul waik wamakothok nocapu ncik appik.”

OIeccuo peret thio thung

²⁰ Ul w'rek iakorronno oka woIouth waat itti
watha'ra nga'rama noca'ri cokamuthe. ²¹ Ul

iakorronno oka woIouth wen wakkakanthet
oPilippic ipokat ponoka'ran koPeththcceitha
ikaik noththok poCelil akin ipittathok itti, “Pit
pin, inthongothe itti onin therene oIeccuo.”

²² OPilippic poingkathe akwothi'ret Anthrauc,

ana Anthrauc ana oPilippic thopakathe akin othi'ret oIeccuo.

²³ AIeccuo othianthet kin itti, "Ca'ri caat cokkal wopul iponyi itti wathikkietta wirik.

²⁴ Mpi'ret non lon ilaik icat itti amma core cocil cakannapot nocapu mono acio ca'rungkwot cik cil culukku anaruk amma ciot cakwono mil moppot. ²⁵ Pul ipongothe thikkoik thung kuret cik, ana okkwi ip'rat thikkoik thung nocapu enci thanguttanthok cik thikkoik thothupuththuput.

²⁶ Okkwi iparekinin ponu itti kwamakothin ana na mpaik pul iparekinin ponu itti pakaik. Ongappa pathikkie okkwi iparekinin pothiakinet cik.

²⁷ Mpaik piirro cikit nti icarak kannan ana mpomma akka ani're, 'Ngappa o'rethin nolon ilaik lainin'? Anaruk ilen akka mpainet noca'ri enci. ²⁸ Ngappa, athrik oka nok'ran kang."

Ittina apo're akkakat ntothi'rot api're itti, "Mpethet thrik ana mpappethet thrik attang."

²⁹ Manakka ul woccikothe lon len ai'rekat itti thule'rak thoKapik apilingon i're itti u'rupa wothothilettat woKapik waik werenok.

³⁰ OIeccuo pi'rekathekin itti, "Po're empi itti apittarot non, pakorronno oka pin. ³¹ Inenni ca'ri cothakkmako cene nocapu ana inenni pul pothopulut ili wonocapu enci wakiccettat thapat. ³² Anaruk amma mponthuttathe nothapak mpanyine ul kathar appik ainin." ³³ Kwi'ret elli akwokene thio itha kwaik pathio.

³⁴ Aul i'rekat itti, "Onin thinat nti iatham wothonce'ret lon cik itti oMiccie pakinnio

thupuththuput ana tat akka appi're itti ukul wopul iponyi wio? Oththa ukul wopul iponyi?"

³⁵ Menik aIeccuo i'rekat kin itti, "K'ran kaik kathociek papotte okorronno oka puccuk non-yaro inakka onon thou k'ran ikaccieik aï'rïmak ngarthuk o'roik. Pul ipanyaro i'rïmak pomma na kwaik paeo. ³⁶ Onocokot lon nomïkït lok'ran ikaccieik inakka onon thou, othakka itti anon oka nyukul nyok'ran ikaccieik." Anakka kwomarttot there kwoththekathe nakin ana kwintakatheik.

Ul woIouth woppot w'rat occokot lon loIeccuo nomïkït

³⁷ Anaruk antoka manna itti oIeccuo pokkothe lon ilommaththik tokït ken, okin thokat thakorronno occokat lon lung nomïkït. ³⁸ Elli lokkattathe othakka itti alon ila pul pothernte lon loKapik oIccaia papi'ret ngngin oka icat itti, "Ili, oththa akkocokothe lon nomïkït ilanïn theret.

Ana oththa akkimmat pu'ran pang iprïk?"

³⁹ Okin thakorronno occokat lon nomïkït nti ilon l'rek attang ammakka pul ipernte lon loKapik oIccaia perethekin ngngin imakkren,

⁴⁰ "Kwi'rimiethekin kït ana onthomiet kin mikït othakka itti akin okorronno immaik ngkït ana manna inaik mmïkït men ana oprttakoik ana mpittiet kin."

⁴¹ oIccaia pi'ret elli akka kwimmat thrïk thoIeccuo ana ilen akka kwerenthet oIeccuo.

⁴² Ul iokat cik woppot ittittik woLouth woc-cokothe lon loleccuo nomik̄it anaruk okin thokat akin okorronno ere lon loleccuo nci nokk̄it akka okin thokat akin opellene ul woPriccin akka ak̄iccekin nocuththun ca'rama. ⁴³ Okin thaththongothe thomerekattat thoul nnothome-rekattat thoKapik.

⁴⁴ OIeccuo pi'rekathekin lon mpo're cittan itti, "Okkwi ipoccokothe lon noc̄ik̄it lin, kwakorronno occokot lon lin tulluk anaruk kwoc-cokothe lon lokkwi ipothiōthin. ⁴⁵ Ana amma akwokathaccen, kwimma okkwi ipothiōthin.

⁴⁶ Mpaat nocapu ncik appik ammakka k'ran ikaccieik othakka itti okkwi ipoccokothe lon lin okorronno ikkoik i'rimak. ⁴⁷ Amma opilin pocc̄ikothē lon ana kwakorronno o'rumo nan, mpakarronno akkma akka mpakorronno ao itti mpathakkma capu ncik appik anaruk mpaat anatho'ret ul. ⁴⁸ Thakkma thaik thokkwi ip'rarin ana 'ra lon lin ila anere, lon len ila mperet lath-akkmak noca'ri cothakkmako. ⁴⁹ Mpakorronno ere ngka kin anaruk ongappa ipothiōthin akkakenen itti ngintha akka ani're ana mpi're tat. ⁵⁰ Mpina kicce itti lon lung lanekarot nothikkoik thothupuththuput. Anaruk lon ilani're laNgappa akki'rethin itti mpi're."

13

OIeccuo pime tacok toul iammakothok

¹ Anakka kamuthe koThaurrot kaman k'rek cik kokuntakinēt ca'ri culukku, oIeccuo pinat itti ca'ri cung caat itti kwaththe nocapu ncik appik akwoine oththan. Kwokat pongothe ul

wung immakothok noma'ri ima kwokat cik nan nocapu, ana inenni kwongothekin kirrkkir.

² Okin thokat cik akin o'rko thu'rit thocipin ana pul pothopulut pi'rikathe ialoutha polcikkari-uththi ukul woCcaman othakka itti akwokero oIeccuo. ³ OIeccuo pinat itti oththan pethok pu'ran polon appik ana itti kwaan noKapik ana kwaine Kapik. ⁴ OIeccuo purokathe nothu'rit akuekat kret cik ika kwappakot nopangken akwi'rikat kret k'rek kottakarran ikin akwothukukkot ngng'ri. ⁵ Akwunat ng'ri no-caththak cïttik akwikkat cik akwime tacok toul immakothok akwukukkwot ngkret ika kwokat pokkwehe ikin.

⁶ Anakka kwainet oCcamaan iponu k'ran itti oPoththuruc, kwi'rekathok itti, "Ili win, ngkwaik pathime tacok tini?"

⁷ AIeccuo othïanthok tit itti, "Ngkwomma lon ila mpaik pakkinthung anaruk noma'ri iman-than ngkwina."

⁸ OPoththuruc p'rakathe, akwi'rekat itti, "Ngkwakorronno ime tacok tin."

OIeccuo pothïathe tit itti, "Amma mpakorronno imenung tacok tang ana ngkwakorronno oka pin."

⁹ OCcamaan oPoththuruc pothïathe tit itti, "Ili, kirrnni imenin tacok tulluk, anaruk imenin nyaun ana ca cakuruk."

¹⁰ OIeccuo pothïatherit itti, "Pul ipopakot ponu itti pimetta tacok tulluk, ka kung appik kella ngu'ru. Ana onon ul win iammakothin, onon thannoka appik thupupure." ¹¹ Akka kwinat okkwi ipokat cik pathokerok, ana

ilen akka kwi'renet itti onon thannoka appik thupupure.

¹² Anakka kwomarttot thimenekin tacok kicce akwakat kret kung, akwopakkat noka'ran kung akwikkat cik akwipittat kin itti, “Onon thina lon ila mpokkinthet noni? ¹³ Onon thakkaron itti, ‘Pul ipangkene,’ ana itti, ‘Ili’ ana laik icat akka mpamenik. ¹⁴ Inenni onon thimmat akka oun Ili won ana pul ipangkene pon pimet tacok ton, onon cakuruk thonu itti onon thimentarene tacok. ¹⁵ Mpokenet non othakka itti annokkot ammakka mpokkinthet non. ¹⁶ Mpi'ret non lon ilaik icat itti pul pella ipareko paka prik nopul ipa kworekine, ana manna pul ipothilathe pakorronno oka prik nopul ipothiothok. ¹⁷ Ana inenni onon thina lon elli amma onon thokkothe ana onon thethiëttat.”

Oieccuo peret lon lothoketta thung

¹⁸ “Mpaik pakorronno eret non appik, mpina okin itha mpumot nti ianon. Anaruk elli lokkat-tathe othakka itti alothakka ila atham wi'ret itti, ‘Okkwi ipanin thaik tha'rko thu'rit pakeron.’ ¹⁹ Mpaik pi'ret non inenni alarthuk othakka, akka amma lothakkat annocokot lon nomikit itti oun oMiccie. ²⁰ Mpi'ret non lon ilaik icat itti okkwi ipikkiet pul cik ipa mpothiothe kwikkierin cik, ana okkwi ipikkierin cik kwikkiet okkwi ipothiothin cik.”

²¹ Anakka kwi'ret lon elli, cikit cokat acirro nti icarak akwi'rekat itti, “Mpi'ret non lon ilaik icat itti opilin nti ianon paik pathokeron.”

²² Aul immakothok ikkat cik akathacetto, othakka itti akin ina itti okkwen akka oIeccuo pokat cik akweret. ²³ Opilin nti iul iammakot oIeccuo ook ipa oIeccuo pongothe, pokat cik akwothöngkakot cik thokkun wothokure iccik koIeccuo nokuppu'rung kothu'rit. ²⁴ OCcamaan ipoccot k'ran cakuruk itti oPuththuruc au'rekat ca akwi'rekat pul ipammakot oIeccuo ipokat iccik kung itti, "Antipittothok itti kwaik peret oththa."

²⁵ Apul pen ipammakot oIeccuo othöngkakot oIeccuo akwipittathok itti, "Ili, oththa pen?"

²⁶ OIeccuo pothäatherit itti, "Ook ipa mpaik pathethet arrakith enni amma mpothapet." OIeccuo pothapekathe arrakith nnggucul ana kwekathe oIoutha Icikkariuththi ukul woCca-
 maan. ²⁷ Anakka oIoutha poccot arrakith, apul pothopulut i'rikat iaak. Ittina aIeccuo i'rekathok itti, "Okkothe ila ngkwonu itti ngk-wakkot cokocokot." ²⁸ Pul pella ipinat lon itti oIeccuo pi'renthok ittina akain noka'ran kothu'rit. ²⁹ Anaruk oIoutha pokat pul ipaccokot akucci wen, ittina opilingon thokat cik akin ome itti ikkre oIeccuo pokat akwomethok itti kwakero pap'rek pokamuthe ana manna itti kwethet ul iaik nothiak. ³⁰ Manakka oIoutha poccot arrakith, akwoppat thapat ana cik cokat ingko'ra.

Nongarot

³¹ Anakka kweot, aIeccuo i'rekat itti, "Inenni ukul wopul iponyi waik wathothikkietta wrik ana Kapik kothikkiettat krik iaak. ³² Ana amma

Kapik kothikkiettat kriik iaak ana Kapik kathikkie ukul wriik iaak ana kathikkiek priik accokkot.

³³ Nyukul nyin, oron thakaik aththut ma'ri motte. Onon thakwariccathin ana ammakka mpi'rethe ul wo'louth, mpi'ret non inenni, noka'ran na mpaik paeo onon thakannanthan. ³⁴ Lon lin ilonthomat ilie ila ani'ret non itti non-garot. Ammakka mpongothenon, onon thou itti nthangarot cakuruk. ³⁵ Ittina ul appik wina itti onon ul iammakothin amma onon thongarothé."

Oleccuo peret thocukkwo nolon thoPoththuruc (Maththa 26.31-35; Markkoc 14.27-31; Lukka 22.31-34)

³⁶ OCcamaan ipoccot k'ran cakuruk itti oPoththuruc ipittathok itti, "Ili, ngkwaik paeo kartha?"

Ana oleccuo pothiatherit itti "Orit thakanneo iraththe'ra ina, anaruk ngkwamakothin noma'ri imanthan."

³⁷ APoththuruc ipittat itti, "Ngintha akkakorronno okorronnon itti mpamakothung ina, Ili? Mpio nti ilon lang."

³⁸ Aleccuo othiat tit itti, "Ngkwocucekotheik icat itti ngkwio nti ilon lini? Mpi'rethung lon ilaik icat itti athak'ruk tharthuk oo ngko'ra engi ngkwacukkwo nolon ma'ri m'rapuruk itti ngkwomman."

14

Oleccuo papiet ul iammakothok cik

¹ "Nokorronno irro mikit nti ikarak. Nonekkit cikit noKapik ana naun acakuruk. ² Kaman kaik koppot tuan na ongappa, amma okat karra

ana mpakorronno i'ret non. Mpaik paeo tentre anothokuccenthet non ka'ran cik. ³ Ana amma mpokuccenthet non ka'ran cik kicce ana mpakkaprttako ntan anathipo non aron oka uraththungon, othakka itti annoka na mpaik. ⁴ Onon thina kathar ika anekot non na mpaik paeo.”

Oieccuo pakathar ikaine oththan

⁵ OThthoma pi'rekathok itti, “Ili, onin thomma na ngkwaik paeo, ana onin thina kathar taththa?”

⁶ Aleccuo othiat tit itti, “Oun kathar ana lon ilaik icat ana thikkoik. Pul pella paine ongappa amma kwakonnoppo naun. ⁷ Amma onon thaththinan kicce itti oun okkwen ana onon thina ongappa cakuruk. Nci inenni onon thinak ana onon thimmarok.”

⁸ OPilippic pi'rekathe itti, “Ili, okenenin ongappa ana lekkot.”

⁹ Aleccuo othiat tit itti, “Pilippic, ngkwommani ana manna mpokat cik itho'rküt thon noma'ri emmi appik? Okkwi ipimmarin, kwimmat ongappa. Ngintha akka ai'rene itti, ‘Okenenin ongappa?’ ¹⁰ Ngkwakorronno occokot lon nociküt itti mpaik iangappa ana ongappa paik iauni? Lon ila mpaik perenenon lakorronno oka lin. Anaruk longappa ipaik iaun akkaik pakkot ngre ngung. ¹¹ Occokothe lon lin nociküt amma ani're itti mpaik iangappa ana ongappa paik iaun, ana manna nongre ia mpokkothe. ¹² Mpi'ret non lon ilaik icat, okkwi ipocckothe lon lin nociküt, kwakkot lon ila mpokat cik anokkettet. Kwakkot manna lirik nelli akka mpaik paine

ongappa. ¹³ Ana mpakkot ilanon ipitto ngk'ran kin, othakka itti aukul onane oththan thrük. ¹⁴ Nipittothin lon ilanon thongothe ngk'ran kin ana mpakkinthet non.”

Oleccuo peret thothiot thoKanang ikupupure

¹⁵ “Amma onon thongothin, onon thaccikot lon lin. ¹⁶ Ana mpipittot ongappa, ana kwe-thet non opilin akwittarot non ana oka nanon thupuththuput, ¹⁷ Kanang ikupupure kolon ilaik icat. Okkwion ithakorronno occokot lon lung nomiküt thakorronno ikkiek cik akka nthakin-nimmak ana manna nthommak. Anaruk onon thinak, akka kwaik ianon inenni ana kwaka nanon noma'ri imanthan. ¹⁸ Mpakorronno okorronnonon ere nyukul inya aththan ana onnan piot nan anaruk mpainenon. ¹⁹ Noma'ri motte ul ncik appik wakorronno appimman anaruk onon thimman. Akka mpaik ngkit thapat ana onon thakaik ngkit thapat cakuruk. ²⁰ Noca'ri cen, onon thina itti mpaik iangappa ana onon thaik iaun ana mpaik ianon. ²¹ Okkwi ipocckithe lon lin ana kwaik pareko ngngin, kwongothin. Ana okkwi ipongothin, ongappa pangathok ana mpangathok cakuruk ana mpakenek ka kin.”

²² Ittina aloutha (okonnoka oloutha ngoIcikkariuththi) i'rekat itti, “Ili, ngkwontha akka ngkwongothe itti ngkwakenenin ka kang ana akorronno okene ul nocapu ncik appik.”

²³ Oleccuo pothiatherit itti, “Amma pul pongothin ana pammakot thongkene thin, ongappa pin pangathok ana onin thainok ana onin thikkoik inaththut. ²⁴ Okkwi ipakorronno ongathin, kwakorronno ommakot thongkene thin.

Lon elli ilanon thaik thaccikot lakorronno oka lin, lon longappa ipothiöthin.

²⁵ Mpaik perenenon elli appik inakka mpaik parthuk uraththungon. ²⁶ Anaruk okkwi ipitarot non, ook Kanang ikupupure, okkwi ipa ongappa othiöt ngk'ran kin, kwangkenenon a'rupu appik ana okwarikiet non lon appik ila mpi'rethenon. ²⁷ Mpaththenenon nothomicco, mpethet non thomicco thin. Mpaik pakorronno ethet non ammakka capu ncik appik ethet non. Nokorronno okorronno mikit mon amirro nti ikarak, nokorronno ipo n're.

²⁸ Onon thocökothe ani're itti, 'Mpaik paeo ana mpaik painenon.' Amma onon thongothin ana onon thaka thopirat noka itti mpaik paine ongappa, akka ongappa priik naun. ²⁹ Mpi'rethenon alarthuk othakka, othakka itti amma lothakkat annocokot lon nomikit. ³⁰ Mpakorronno erenenon lon loppot, akka pul pothopulut ili wonocapu ncik appik enci waik wantan. Mpakorronno oka inyaun nyung, ³¹ anaruk capu ncik appik conu itti cina itti mpongothe ongappa ana mpakkot lon ila ongappa pi'rethin itti mpakkot. Nuroko aron eo."

15

Pira ana u'ri wen

¹ "Oun pira ipakwono nyukul nyoporot icat ana ongappa akkakatha lon lokira. ² Kwathiot u'ri wokira cik appik iakorronno okwono ana u'ri iakwono akwokwet othakka itti akwono nyukul nyoppot. ³ Onon thothikkiettat tho'rillir nti ilon ila mperenet non. ⁴ No'rungkwot iaun

ana mpa'rungkwot ianon. Ku'ri kopira kella ikakwono prek, konu itti kaka nopira ana ittina onon thakorronno okkot lon l'rek amma onon thella iaun.

⁵ Oun pira ana onon u'ri wopira. Amma pul po'rungkwothe iaun ana mpo'rungkwothe iaak, kwakkot lon loporot loppot. Ana okkwi ipella iaun kwakorronno okkot lon l'rek. ⁶ Ana amma okkwi ipakorronno o'rungkwot iaun, kwarretta ere ku'ri kopira ikonthomat, ammakka ku'ri ken kummuntat cik akorrettat ithik akok'ro. ⁷ Amma onon tho'rungkwothe iaun ana lon lin la'rungkwot ianon, ana amma nthipittot lon l'rek, onon thiot. ⁸ Elli lanane ongappa thrik itti onon thakkot lon loppot iloporot ammakka kira ikakwono nyukul nyoporot ana annokene ka kon itti onon ul iammakothin.

⁹ Ammakka ongappa pongothin, mpongothenon. Ittina no'rungkwot ithongat thin. ¹⁰ Amma onon thaccikot lon lin, onon tha'rungkwot ithongat thin ammakka mpoccikothe lon longappa ana a'rungkot ithongat thung. ¹¹ Mperenet non elli anothikkienon thopirat noka llon lin ana thopira noka thon oka thoporot kirrkkir. ¹² Lon lin ilonthomat itti nongarot ammakka mpongothe non. ¹³ Thongarot thella thrik kannan nothongat itti pul piine opuruko pungon." ¹⁴ Onon opuruko pingon amma onon thakkot lon ila ani'ret non itti nthakkot. ¹⁵ Mpakorronno appakkaronon itti iak p'rin akka iak womma ila apit paik pakkot. Anaruk mperenenon ammakka opuruko pingon ana mperenet non lon appik ila ongappa

pongkenerin. ¹⁶ Onon thakorronno onekkethin cik anaruk oun akkonekkethenon cik annokkot lon loporot ammakka pira ipakwono nyukul nyoporot thupuththuput. Ana ongappa pethet non ilanon ipitto ngk'ran kin. ¹⁷ Lon lin ila ani'ret non ilonthomat itti onon thangarot.

Ul wonocapu ncik appik w'ra ul iammakothok

¹⁸ “Amma ul wonocapu ncik appik want'ra non, nina nan itti w'rarin cittokit. ¹⁹ Ana amma onon thocapu ncik appik, cangat non itti onon thung. Anaruk onon thakorronno oka thocapu ncik appik akka mpakkarot non nti iakin nocapu ncik appik. Ilen akka ul wocapu ncik appik w'ranet non. ²⁰ Nokwarttikot lon ila mpi'rethenon itti, ‘Pul ipareko pella prīk nopul ipa akworekine.’ Amma okin thoccokiethin thiak ana okin thaccokiet non thiak cakuruk. Ana amma okin thoccikothe lon ila mpongkenet kin ana okin thaccikot lon lon cakuruk. ²¹ Okin thakkot non menik nti ilon lok'ran kin akka okin thomma okkwi ipothiethin. ²² Amma mpokat pakorronno anthan ana erenekin, okin thakorronno okat thamoloko llon ilokithak. Inenni okin thella lon cik ilakin orrot noka ken ngngin. ²³ Okkwi ip'rarin, kw'rat ongappa cakuruk. ²⁴ Amma mpappakorronno okkot lon itho'rkit then ila pul pella pokkothe nan, okin thakorronno occot lon itti okin thokithak. Anaruk inenni okin thimmat lon ilommaththik ila mpokkothe anaruk okin tharthuk th'rarin ana 'ra ongappa. ²⁵ Anaruk elli lokkattathe othakka itti alothakka ammakka lokurrakot iatham

wothonce'ret lon cik len ili're itti, 'Lon lella ilakin th'rathin nan.'

²⁶ Amma okkwi ipittararot paat ipa anothinthet non nangappa, Kanang ikupupure ikaik icat ikanthan naak, kerenenon lon lin.

²⁷ Anaruk onon thonu itti onon theret cakuruk akka oron thokat cik uraththungon ncinomun."

16

U'rupa iupupure

¹ "Mperenet non lon elli appik othakka itti annokorronno urttat cik. ² Okin thathokiccet non thapat nocuththun ca'rama, ca'ri caik canthan ica ul iangwonon ome itti okin thaik thakkinthet Kapik lon loporot. ³ Okin thakkot menik akka okin thomma ongappa ana manna okin thomman. ⁴ Mpi'rethenon lon elli othakka itti amma ca'ri cen caat anon okwarikot itti mpokat pi'rethenon lon len. Mpokat pakinni'ret non lon elli ncinomun akka oron thaththokat aththut."

Ngre ngoKanang ikupupure

⁵ "Anaruk inenni mpaik paine okkwi ipothiothin, ana manna pul pella nti ianon ipipittothin itti, 'Ngkwaik paeo kereni?' ⁶ Onon thakorronno oka thoporot noka akka mperenet non lon elli. ⁷ Anaruk mpaik perenenon lon ilaik icat, loporot nanon itti mpaeo akka amma mpakorronno eo okkwi ipittarot non pakorronno anthan. Anaruk amma mpeot ana mpathothinthet non ngok. ⁸ Amma kwaan,

kwangkene ul wonocapu lon lolon ilokithak ana ongkenekin itti okin thaka thoporot tat tokit koKapik ana ongkenekin lon lothakkma thoKapik. ⁹ Kwakenekin lon lothokithaka then akka okin thakorronno occokot lon lin nomik̄it. ¹⁰ Ana kwakenekin lon lothoka thoporot then tokit koKapik akka mpaik paine ongappa nanon okorronno appimman. ¹¹ Ana kwakenekin lon lothakkma thoKapik akka Kapik kakkmat pul pothopulut ntit ili wonocapu.

¹² Mponu lon lanerenenon loppot inenni anaruk lalkot non. ¹³ Anaruk amma Kanang kolon ilaik icat anthan, kwangwot non ilon iloporot appik. Anaruk kere lon tulluk ila koccikothē ana kerenenon lon ilaik lathanthan. ¹⁴ Kanang ken ikupupure kananin thrik akka kaneko lon ila mponu itti mpi'ret non akokenenon. ¹⁵ A'rupu wongappa appik ien win, ilen akka mpi'renet itti Kanang ikupupure kaneko nnolon lin akokenenon."

Thoccokot thiak thaprttako thopira noka

¹⁶ "Papotteik onon thakinnimman ana papotteik onon thimman."

¹⁷ Aul iammakothok w'rek ikkat cik aerettarne itti, "Ngintha akkonu itti, 'Papotteik onon thakorronno appimman ana papotteik onon thappimman,' ana ngintha akka akwi'rene itti, 'Akka mpaik paine ongappa pin'?" ¹⁸ Okin tho'rungkwathe nan akin ipitto itti, "Ngintha akkonu itti, 'papotteik'? Oron thomma lon ila kwaik pere."

¹⁹ OIeccuo pinat nan itti okin thongothe itti okin thipittothok lon len, akwi'rekat kin itti,

“Onon thaik thipittarot lon ila mpi'ret itti, ‘Papotteik onon thakorronno imman ana papotteik onon thappimmani’? ²⁰ Mpi'ret non lon ilaik icat itti onon thangk'riko ana oo anaruk aul wonocapu ncik appik occiro ana opira noka. Onon thipo thiak anaruk thiak thon thaprttakoik ana thathakka thopira noka. ²¹ Ka kak'rello pul ipopari amma apokwono ana ka kak'rellok akka ca'ri cung caat itti kwakwono anaruk amma ukul wokwontat kure nothok'rellako akka kwopirat noka nokkul itti wokwontathe nocapu appik. ²² Ittina inenni ca'ri cothocokot thiak con enci, anaruk mpappimma non ana onon thapira noka ana pul pella panekot non thopira noka thon. ²³ Ca'ri cen onon thakorronno appipittothin pap'rek aththik. Mpi'ret non lon ilaik icat itti ongappa pethet non a'rupu appik ia annipitto ngk'ran kin. ²⁴ Ana manna inenni onon thakorronno ipitto lon l'rek ngk'ran kin aththik. Nipitto ana onon thacco ana thopira noka thaka thoporot kirrkir.

²⁵ Mpokat anere nthokkwie lon kuru ncik ana ca'ri canthan ica anokorronno erenenon nthokkwie lon kuru ncik anaruk mperenenon lon longappa nci nokkit. ²⁶ Ca'ri cen, onon thipitto lon ngk'ran kin. Mpaik pakorronno i're itti mpipittinhet non ongappa nti ianon. ²⁷ Aa, ongappa ngka kung pongothenon akka onon thongothin ana onon thocokothe lon nomikit itti mpaat noKapik. ²⁸ Mpaat nangappa anao nocapu appik ana inenni mpaik paththe nocapu appik anopakkinhet ongappa.”

²⁹ Ittina aul woIeccuo iammakothok i'rekat itti,

“Inenni ngkwaik pere lon nci nokküt, ngkwaik pakorronno ere okkwie lon kuru ncik. ³⁰ Ittina onin thimmat itti ngkwina lon appik ana lakorronnoka manna itti ngkwipittakot lon l'rek, elli lakorronnonin, anin occokot lon nomiküt itti ngkwaat noKapik.”

³¹ Aleccuo i'rekat itti, “Onon thantroccokot lon loKapik nomiküt mon ocothot p'rin. ³² Anaruk ca'ri caik cao ana caat manna amma anon opetakot cik ikaman kon kurekkurek, onon thaththe naun pellek, anaruk mpakorronno oka pellek, ongappa paik naun. ³³ Mpi'rethenon lon elli itti annapot miküt cik. Onon thaccokiettat thiak cene nocapu ncik appik anaruk nopo'rathan, akka mpalkothe lon lonocapu appik.”

17

Oleccuo pa'rane ka kung nga'rama

¹ Manakka oleccuo pi'ret lon elli, akwokathakat tothi'rot akwi'rekat itti, “Pappa, ca'ri cei caat p'rin ethet ukul wang thrik othakka itti aukul wang ina akka ethung thrik. ² Akka ngkwethok ngili ikkun ngolon loul appik itti akwethet kin thikkoik thothupuththuput okkwion itha ngkwethok. ³ Thikkoik thothupuththuput itti akin inang, oung pellek ipaKapik ikaik icat, ana oleccuo oMiccie ipa ngkwethiothe. ⁴ Mpokenet ul thrik thang nocapu nthomartto ngre ia ngkwethin itti mpakkot. ⁵ Ana inenni, ngappa, ethin thrik nci na ngkwaik itharit thonat nci ma'rot acapu appik carthuk oku'retta ncik.”

OIeccuo pa'rane ul iammakothok nga'rama

⁶ “Mpokenet ul ia ngkwethin cene nocapu itti oung okkwen. Okin thokat thang ana ngkwethin kin ana okin thoccikothe lon lang. ⁷ Ana inenni okin thina itti a'rupu ncik appik ia ngkwethin waat naung. ⁸ Mpethet kin lon ila ngkwethin ana okin thoccokothe. Okin thinat icat itti mpaat naung ana okin thoccokothe lon nomikit itti oung akkothiöthin. ⁹ Mpa'ranekin nga'rama, anaruk mpaik pakorronno a'rane ul wocapu ncik appik anaruk mpaik pa'rane okkwion itha ngkwethin akka okin thang. ¹⁰ Ila mponu appik lang ana ila ngkwonu appik lin. Ana thrük thainin nti iakin. ¹¹ Mpaik pakorronno ikkoik nocapu ncik appik puccuk anaruk okin tharthuk thaik nocapu ncik appik ana mpaik painung. Ngappa ipupupure, angwothekin mpu'ran pok'ran kang, k'ran ika ngkwethin othakka itti akin oka thulukku ammakka orit thulukku. ¹² Ca'ri ica mpokat inaththut mpangwothekin ana o'rumo nakin ngk'ran ika ngkwethin, opilin pellat ipuratheik tulluk okkulukku iponu itti kurat cik othakka itti alon okaik ammakka lokurrakot iatham woKapik.

¹³ Mperik painung anaruk mpi're elli amparthuk paik nocapu othakka itti akin oppapat nthopira noka thin. ¹⁴ Mpethet kin lon lang ana ul wonocapu enci w'rat akka okin thannoka thonocapu enci ammakka mpakanoka ponocapu enci. ¹⁵ Tha'ra nga'rama thin annoka itti aneko kin nocapu anaruk othakka itti angwot kin nti inyaun nyopul pothopulut. ¹⁶ Okin thakorronno oka thonocapu ncik

appik ammakka mpakorronno oka ponocapu. ¹⁷ Othikkiekin thupupure llon ilaik icat, lon lang laik icat. ¹⁸ Ammakka ngkwothiothin nocapu ana mpothiothe kin nocapu cakuruk. ¹⁹ Mpakuccet ka kin cik anoreko nti ilon len othakka itti akin okuccekot cik cakuruk akin orekinung icat.”

Oleccuo pa'rane ul appik ng'rama iaccokot lon nomikit

²⁰ “Mpaik pakorronno a'ranekin nga'rama thellek. Mpaik pa'rane okkwion cakuruk ithathocokot lon lin amma okin thoccikothe lon len. ²¹ Othakka itti akin oka thulukku appik, ngappa, ammakka ngkwaik iaun, mpaik iaung. Ana akin oka iarit othakka itti aul appik occokot lon nomikit itti oung akkothiothin. ²² Mpethet kin thrik itha ngkwethin othakka itti akin oka thulukku ammakka orit thulukku. ²³ Mpaka iakin ana ngkwaka iaun, ittina okin thathakka thulukku othakka itti aul nocapu ina itti ngkwothiothin ana ngkwongothekin ammakka ngkwongothin. ²⁴ Ngappa, mpongothe itti ul ia ngkwethin wanin oka aththut na anoka akin imma thrik thin, thrik itha ngkwethin akka ngkwongothin nci nomun acapu carthuk oku'retta ncik.

²⁵ Ngappa ipoporot, ul wonocapu wommang, mpinang ana okin thina itti ngkwothiothin. ²⁶ Mpokenerung kin ana mpa'rungkwot nan okeneng kin, athongat thang itha ngkwongothin oka iakin, ana oun ngka kin anoka iakin.”

18

Oieccuo poccokittathe

(Maththa 26.47-56; Markkoc 14.43-50; Lukka 22.47-53)

¹ Anakka oIeccuo pomarttot tha'ra nga'rama, kwoingkathe okin oul iammakothok arrot thupu'ru thoKithurun. Nthocipit cothupu'ru c'rek, ka'ran k'rek kokat cik than konat kira koceththun, aIeccuo i'rikat tit akin oul iammakothok. ² OIoutha ipokerothe oIeccuo nili pinat noka'ran ken akka oIeccuo pokat than ma'ri moppot akwikikkoik than okin oul iammakothok. ³ Ittina oIoutha pakkakathe cinang nnul irro ana nili n'rek noul ittittik woul wonoppa toKapik ana ul woPriccin okin thokat akin onneko lik no'ren ana arran.

⁴ Ana akka oIeccuo pinat lon appik ilokat cik lathothakka, kwoppanthet kin thapat ana kwipittathekin itti, "Oththa akka annokwantot?"

⁵ Akin othiat tit itti onin thaik thakwantot "Oieccuo poNaccir."

Aieccuo i'rekat kin itti, "Oun ook." Ana oIoutha ipokerothok ul pokat cik akin oco'ro aththut. ⁶ Manakka oIeccuo pi'ret itti, "Oun pen," akin opakkat thomeken akin apukkat nocapu appik.

⁷ Akwappipittat kin attang itti, "Oththa akka anon okwantot?"

Akin i'rekat itti, "Onin thaik thakwantot oIeccuo poNaccir."

⁸ Aieccuo i'rekat kin itti, "Akka mpi'rethenon itti oun ook. Amma onon thaik thakwantothin nokorronno aul enni eo." ⁹ Elli lothakkat othakka itti alon lung ila kwappi'ret othakka

itti, “Mpakorronno uret opilin cik ntiakin itha ngkwethin.”

¹⁰ Ittina aCcamaan oPoththuruc iponat ki'rittang ikukwit akwothat akwokat kunu koMalkkac pul iparekine pul iprik ponoppa toKapik. ¹¹ Aleccuo i'rekat oPoththuruc itti, “Opakkethe ki'rittang ikukwit ika'ruk, mpira pakorronno occokot thiak itha ngappa pothiothin itti mpaccokori?”

Oleccuo ponekittanet Annan

(Maththa 26.57–58; Markkoc 14.53–54; Lukka 22.54)

¹² Ittina aul irro ana ili wen ana nili n'rek noul woIouth occokat oleccuo, akin i'rikikkathok ¹³ akin onakathok cittokit tokit kAnnan ipokat opithe poKiappa pul iprik ponoppa toKapik nothuput then. ¹⁴ OKiappa ipappomethe ul woIouth itti laka loporot itti pul pio pulukku nti ilon loul appik.

OPoththuruc pacukkwo naIeccuo

(Maththa 26.69–70; Markkoc 14.66–68; Lukka 22.55–57)

¹⁵ OCcamaan oPoththuruc ana pul ipammakothok w'rek thokat cik akin ommakot oleccuo. Anakka pul ipammakothok pen pokat pinakot mpul iprik ponoppa toKapik, kwi'rikathe okin oleccuo itha'rapak thonoppa topul iprik ponoppa toKapik, ¹⁶ anaruk oPoththuruc pokat cik akwo'rikot cik thapat. Pul ipammakothok p'rek ipa pul iprik ponoppa toKapik pokat pinat akkakat thapat aperekanthet ukul iopari iokat cik angwot cürük akwi'rikiekat oPoththuruc noppa.

17 Aukul iopari iokat icürük ipittat oPoththuruc itti, “Ngkwakorronno oka opilin nti iul iammakothoki, oung pai?”

APoththuruc othiat tit itti, “Mpakorronno oka inaththungon.” 18 Cik cokat cirruk ana ul iarekine ul ana ul iangwot cik ikkat cik aikot thik ana oPoththuruc pokat cik cinang cakuruk akin aththungon akwikot thik.

Pul iprik ponoppa toKapik pipittot oIeccuo lon

(Maththa 26.59–66; Markkoc 14.55–64; Lukka 22.66–71)

19 Apul iprik ponoppa toKapik ipittat oIeccuo lon loul iammakothok ana lon lothongkene thung.

20 Aleccuo othianthok tit itti, “Mperenet ul apik nci nokkit ana mpokat cik anongkekkene nomuththun ma'rama ana manna noppa toKapik na ul woIouth wokot a'rntattakot. Lella ila mpi'ret nthu'ran. 21 Nthontha akka annipittothin lon? Nipittot okkwion ithoccikothe akka anere, okin thina ila mperet.”

22 Manakka oIeccuo pi'ret lon len apul ipangwot cik ipokat iccik kung okkwathok toca. Api'rekathok itti, “Kathar engki akka erene pul iprik ponoppa toKapik nngini?”

23 Aleccuo i'rekathok itti, “Amma mpi'ret lon moloko akenen ila mpi'ret moloko ana amma mpi'ret lon oce'ret cik, ngingtha akka ngkwokkwinin?”

24 Ittina Annan pothiathok naKiappa pul iprik ponoppa toKapik akkw'rikikkakot.

*OPoththuruc pacukkwo nan itti kwomma oIec-
cuo attang*

*(Maththa 26.71-75; Markkoc 14.69-72; Lukka
22.58-62)*

²⁵ Anakka oPoththuruc pokat cik akkwaik akwikot thik akin appipittathok itti “Ngkwakorronno oka opilin nti iul iammakothoki oung pai?”

Akwocukkat nan akwi'rekat itti, “Mpakorronno oka poul wothonlettat wung.”

²⁶ Apul p'rek iparekine pul iprik ponopan toKapik pokat ku'ri kopul ipa oPoththuruc pappokiothe kunu cik, i'rekathok itti, “Mpannimmathung noka'ran kokira koceththuni?”

²⁷ APoththuruc appocukkwat nan, ca'ri cen athak'ruk oa.

OIeccuo paik tokit koPilaththoc

*(Maththa 27.1-2, 11-14; Markkoc 15.1-5;
Lukka 23.1-5)*

²⁸ Ana ngi'rimak aul woIouth ipat oIeccuo ntuan toKiappa akin oingkathok ngngin tuan toili woRoma. Anaruk okin thakorronno i'rikat noppa ten akka okin thathth'rat itti okin thipot lon ilokithak noka ken akka okin okorronno o'rko thu'rit thokamuthe koThaurrot kaman k'rek cik. ²⁹ APilaththoc akkakanthet kin thapat akwipittat kin itti, “Lon liatha ila non thorukwethe pul empi ngngin?”

³⁰ Akin othianthok tit itti, “Amma kwappakorronno okkot lon moloko, onin thakorronno onanung ngok cene.”

³¹ APilaththoc i'rekat kin itti, “Nonekok anakkamak llon lothonce'ret lon cik lon.”

Akin othiat tit itti, “Onin thella lon cik itti onin thakkwot pul p'rek.” ³² Elli lokkattathe othakka itti alothakka ammakka oIeccuo pi'ret akweret thio thung itha kwaik pio.

³³ APilaththoc opakkat noppan toili akwakkarat oIeccuo akwipittathok itti, “Oung ili woIouthi?”

³⁴ AIeccuo ipittathok itti, “Lon ellrik langi, ana amma okorronno oka lang opilingon therenung lon lini?”

³⁵ APilaththoc othianthok tit itti, “Ngkwame itti oun pul poIouthi? Ul wang ana ul ittittik woul wonoppan toKapik akkonarung, ngintha akka ngkwokkothe pamoloko?”

³⁶ AIeccuo i'rekat itti, “Ngili ngin ngakorronno oka ngonocapu ncik appik enci. Amma ngan-gokat ngonocapu ncik appik enci, ul iarekinin wrrothe naun itti ul woIouth wakorronno oc-cokothin. Anaruk inenni ngili ngin ngonoka'ran pellek.”

³⁷ APilaththoc omekat itti, “Ittina ngkwailina.” AIeccuo othiat tit itti, “Ngkwi're itti mpaili. Ilen akka mpokwontanet ana ilen akka mpainet nocapu appik anathokene lon ilaik icat. Ana okkwi ipaik ilon ilaik icat, kwoccikothin.”

³⁸ APilaththoc ipittat itti, “Ngintha akkonu itti lon ilaik icat?”

*OIeccuo pakkmakot itti kwakkuttat
(Maththa 27.15-31; Markkoc 15.6-20; Lukka 23.13-25)*

Akka oPilaththoc pi'ret lon len, akwoppat tha-pat akwomekat ul woIouth attang itti, “Mpakan-niot lon l'rek ilokithak nopul empil ila anakkmak

ngngin. ³⁹ Anaruk thathuma thon itti mpelikkinenon pul p'rek nti ikorrkkor nokamuthe koThaurrot kaman k'rek cik, onon thongothe itti mpelikkinenon ili woIouthi?"

⁴⁰ Akin okkwat kuri itti, "Kirrnni elikkok, elikkinet nin oParapac." OParapac pokat pokkothe camutta akwereket ul nongili.

19

OIeccuo pakkmakot nthokkwettat nothapak

¹ Ittina aPilaththoc i'rekat ul wung itti okin thaneko oIeccuo akin othokkwekok. ² Aul irro otherat tukwia toli akin onekkekanthet oIeccuo ica. Akin akiekathok kret kothlo ere maa ika nili ako ³ ana okin thokat akin aukkwwo akin okkwekok akin omethok itti, "Taththa Ili woIouth."

⁴ OPilaththoc appoppat thapat ai'rekat ul woIouth itti, "Mpaik pananenon ngok akka mpanniot lon ilakorronnok akwakkmako."

⁵ Anakka oIeccuo poppothe thapat akkwakot li ica lokkattathe ere cupul coili ana kret ikothlo ere maa, aPilaththoc omekat kin itti, "Nokathane pul pei."

⁶ Manakka ul ittittik woul wonoppa toKapik ana ul iangwot tupa toKapik thimmat oIeccuo akin ikkat cik akin i'rekat lon mpo're citta itti, "Nokkwethok nothapak nokkwethok nothapak."

Anaruk oPilaththoc pothiant het kin tit itti, "Nonekok annokkwethok nothapak akka mpakinniot lon ila anakmak ngngin."

⁷ Aul woIouth o'rungkat nolon ai're itti, "Onin thonu lon lothonce'ret lon ncik ana ammakka

lon len kwonu itti kwakkwettat nothapak akka kwi'rethe ka kung itti ook ukul woKapik.”

⁸ Manakka oPilaththoc poccikothe lon elli akwipat manna n're kannan ⁹ akwopakkat noppa tung. Akwipittat oIeccuo itti, “Ngk-waat ngkartha?” Anaruk oIeccuo pangkatheik. ¹⁰ APilaththoc i'rekathok itti, “Ngk'rat erenini?” Akwapprttat nan itti, “Ngkwomma itti mponu ngili ikkun itti mpelikkong ana manna itti mpakkwethung nothapaki?”

¹¹ AIeccuo othiat tit itti, “Ngkwakannonat pu'ran amma pappanettathung ntothi'rot. Ittina okkwi ipethin oung ikkun ponu lon lokithak kannan.”

¹² Ncinang aPilaththoc enekkekat itti kwelikko oIeccuo anaruk ul woIouth wikkatheik a'retto itti, “Amma ngkwelikkot pul empi mono apeo ngkwakorronno oka opuruko poKaiccer akka okkwi ipi'ret ka kung itti kwaili kworakket lon loKaiccer.”

¹³ Manakka oPilaththoc poccikothe menik akwonakat oIeccuo thapat akwikkat cik noprrok pothakkma noca'rakat conili iconat k'ran itti Kapattha ngKarru koIpranin. ¹⁴ Ca'ri cen cokat cothokuccekinthet kamuthe koThaurrot kaman k'rek cik ana cik cokat icingki ippa, aPilaththoc i'rekat ul woIouth itti, “Nokatha ili won wei cene.”

¹⁵ Anaruk okin thi'rekathe lon mpo're citta itti, “Opa'rek cik, opa'rek cik, nokkwethok nothapak.”

APilaththoc ipittat itti, “Mpakkwinthet non ili woni?”

Aul ittittik woul wonoppa toKapik i'rekat itti, "Onin thella ili cik, oKkaiccer pulluk." ¹⁶ Menik aPilaththoc eekat kin oIeccuo akwothokkwettat nothapak.

Thokkwettat nothapak

(*Maththa 27.32-44; Markkoc 15.21-32; Lukka 23.26-43*)

Ittina aul irro onekat oIeccuo. ¹⁷ AIeccuo onekat thapak itha akwothokkwettat nan, akwoingkat ngngin noka'ran ikoccot k'ran itti k'rintil koca ilonu itti Culucutha ngKarru koIpranin. ¹⁸ Okin thokkwekathok nothapak noka'ran koCulcutha nnul w'rek we'ra, opilin nthokkun wothokure ana opilin nthokkun wothothari ana oIeccuo itho'rküt then. ¹⁹ APilaththoc a'rekat lon nothapak lokurrakot itti, OIECCUO PONACCIR ILI WOIOUTH. ²⁰ Ul woppot woIouth wakkakkarathe lon len akka ka'ran na aleccuo pokkwettathe nothapak kokat napuththut noka'ran koUrucelim ana lon lalokurrakot ngkarru koul woIpranin ana koul woKrik ana koul woRoma. ²¹ Aul ittittik woul wonoppa toKapik a'rettat naPilaththoc akin omekathok itti, "Kirrni okurro itti, 'Ili woIouth' anaruk okurri itti pul empi pi'ret itti paIli woIouth."

²² APilaththoc i'rekat itti, "Lon ila mpokurrot mpokurrot p'rïn."

²³ Manakka ul irro wokkwethe oIeccuo nothapak akin onekat kret kung akin illillat tit mprak woco'rin akin onekat wululuk ana akin onekat kret kulukku ikokat kannettettat ana kokat muang nci tompara mono uat ci noracok.

²⁴ Akin i'rekat itti, “Ntrun okorronno illillorit, ntrun okkwot mo'rio nan unokatha itti okkwen akkaneko.” Elli lothakkakathe ammakka atham wi'ret itti lakkattat itti,

“Okin thillillo iret win
ana okkwot mo'rio nokret kin konoka.”

Elli akka ul irro wokkothe. ²⁵ Ana iccik kothapak itha oIeccuo pokkwettathe nan, onnan pokat cik akwoco'ro nan ana opang ponnan ipopari ana oMeriom opari poKklopa ana oMeriom mo-Macthelia. ²⁶ Anakka oIeccuo pimmat onnan akwoco'ro cĭnang akin opul pothothĭlettat pung ipa kwappongothe kannan, kwi'rekathē onnan itti, “Pul ipopari, okatha ukul wang enrik.” ²⁷ Ana kwomekathē pul pothothĭlettat pung itti, “Okatha onne perik.” Nci cĭnang apul pung pothothĭlettat emprĭk onekat oMeriom tuan thanung.

Thio thoIeccuo
(*Maththa 27.45–56; Markkoc 15.33–41; Lukka 23.44–49*)

²⁸ Ittina oIeccuo pinakathē itti lon appik lomtathē ana itti lon latham laik lathokkattat ammakka lokurrakot, akwi'rekat itti, “Pica paik pakkwothin.” ²⁹ Ana cakkolok cokat cik cĭnang conat ngapak tit ior oppat, akin othapekat ngkret akin onekkekat nokwo'ren akin oku'rekanthet oIeccuo ithon. ³⁰ Anakka oIeccuo pinothē ngapak engrĭk iokat ngor akwi'rekat itti, “Locothakothe p'rĭn,” akuekat tocaik, akwokorronnat utha aeo nti iaak.

³¹ Ca'ri cen cokat ca'ri cothokuccekinthet ca'ri caCcepith cik icokat nokamuthe koThaurrot kamam k'rek cik. Anakka ul woIouth wakorronno angkot itti ummi wakwentako nothapak, okin thomekathe oPilaththoc itti ocottothe tacok toul iokkwettathe nothapak ana orpet kin cik nolapak akka okin thokat th'rat itti ca'ri caCcepith cathiot kin nolapak menik. ³² Ittina aul irro akkakat akin ocottanthet okkworokit tacok ipa pokkuttathe nothapak akin oIeccuo ana topiling cakuruk. ³³ Anakka okin thaata naleccuo akin athiat itti kwiot ntit akin okorronnat ocottot tacok. ³⁴ Apul p'rek nti iul irro ekat oIeccuo iunyit ngkathuk angüccük oppat aththaman ana ng'ri. ³⁵ Pul ipimmat lon len pi'rekathe lon ana lon lung ila kwi'ret laik icat ana kwinat itti kwi'ret lon icat itti annocokot lon len nomikit. ³⁶ Elli lokat cik othakka itti alon latham othakka ilokurrakot itti, "Cummian cung cella icacothako" ³⁷ ana ammakka lokurrakot noka'ran iatham w'rek cakuruk itti, "Okin thakatha okkwi iperat."

Thocikkako thoIeccuo
(*Maththa 27.57-61; Markkoc 15.42-47; Lukka 23.50-56*)

³⁸ Anakka oIeccuo piot, oIuccip ponoka'ran koRami ipappokat pul pothothilettat poIeccuo nthu'ran akka kwonat n're noul woIouth akkakat akwipittat oPilaththoc kumi koIeccuo itti kwakorronnok akwoneko. Ana oPilaththoc poccikanthok akwakkakat akwonekat kumi koIeccuo. ³⁹ Okin thokat cik okin oNikkothemoc ipappoinet oIeccuo thongk'ra akkwonat kilu

arrial (30) ana attul kamutha ana ngaak iakkunako ere amutha. ⁴⁰ Akin onekat kumi koIeccuo akin o'remethekat kumi ikret akin okkat amutha nan kicce ikret kothocikkararo. ⁴¹ Ana noka'ran ikakin thaththokkwethe oIeccuo nothapak, ka'ran kokira kotteik k'rek kokat cik than ana konat tupu tit tie takorronno ocikkakat pul p'rek tit aththik. ⁴² Anakka ca'ri cokat coul woIouth cothokuccekinthet ca'ri caCcepith cik ana tupu tokat napuththut, okin thocikkathe oIeccuo tit.

20

Tupu ncürük

(Maththa 28.1-10; Markkoc 16.1-8; Lukka 24.1-12)

¹ Ana ngi'rïmak noca'ri corokit noma'ri ime're'rapuruk, aMeriom moMacthelia oingkat thoppu ana ngi'rïmak ngokat cik akwimmakat pothok appopa'rettat cik ntoppu. ² Akwollat oine oCamaan oPoththuruc ana pul pothothilettat p'rek ipa oIeccuo pappongothe, akwomekat kin itti, "Okin thonekot Ili nti ippu ana oron thomma nakin thonekkethok." ³ APoththuruc okin opul pothothilettat poIeccuo p'rek oingkat thoppu. ⁴ Okin thokat akin opellettot tit aththuththu'ra anaruk pul pothothilettat poIeccuo p'rek purrathe oPoththuruc apakkakat thoppu tokit naak. ⁵ Apirrat cik, apokathakat cik ana pimmakathe eret iokat wo'remethettathe oIeccuo awaik ceneket anaruk pakinni'rikat irpu than. ⁶ Anakka oPoththuruc ipokat thoceken paat, kwi'rikathe ippu ana kwimmakathe eret

iokat wo'remethettathe oIeccuo awaik ceneket,
⁷ ana kret ika kwocikkakot ngngin ikokat noca
 coIeccuo kothettakotheik noka'ran kung pellek.
⁸ Apul pothothilettat ipokat paat tokit i'rikat
 cakuruk ana pimmakathe ana poccokathe lon
 nocikit. ⁹ (Okin thattharthuk thakinnina lon
 latham ili're itti oIeccuo puroko nti ithio.) ¹⁰ Ul
 iammakothok aure'ra opakkat tuan na akin
 thokat akin ikkoik.

*OIeccuo pumminthet oMeriom moMacthelia
 ncik*
(Markkoc 16.9-11)

¹¹ Anaruk oMeriom moMacthelia poco'rothe
 thapat norupu akwoo. Anakka kwoot
 kwirratheik akwokathakat ippu, ¹² akwimmakat
 u'rupa wothothilettat woKapik we'ra wakot eret
 wipuk aikkoik noka'ran na ka koIeccuo kokat cik,
 opilin nthoca ana opilin nthoracok. ¹³ Au'rupa
 wothothilettat woKapik wen ipittathok itti, "Pul
 ipopari ngkwontha akka aoo?"

Akwi'rekat kin itti, "Okin thonekot Ili win ana
 mpomma nakin thonekkethok." ¹⁴ Akka kwi'ret
 menik akwoliakat thocoken cung akwimmakat
 oIeccuo akwoco'ro ana kwommat itti oIeccuo.

¹⁵ AIeccuo i'rekathok itti, "Pul ipopari, ngk-
 wontha akka aoo? Ngkwaik pakwantot oththa?"

AMeriom pokat cik akwopri pul pokarak, ak-
 womekat pul pen itti, "Pit pin, amma oung
 akkonekorok, akenen na angkwonekkethok an-
 othonekok."

¹⁶ AIeccuo i'rekathok itti, "Meriom."

Ameriom oprttakat iaak akwi'rekat mpo're cittan itti, "Ropuni." (Ilonu ngKarru koIpranin itti pul ipangkene.)

¹⁷ Aieccuo i'rekathok itti, "Kirrnni occokothin akka mparthuk pakorronno opakkinthet ongappa anaruk ngkoinet opangkingon, ai'ret kin itti 'Mpaik paku'rinthet ongappa pin ana pon ana Kapik kin ana kon.' " ¹⁸ AMeriom moMacthe-
lia opakkanthet ul woIeccuo iammakothok llon, akwi'rekat kin itti, "Mpimmat Ili oIeccuo." Ana kwi'rekathekin lon ila oIeccuo perenok.

*OIeccuo pumminthet ul iammakothok ncik
(Maththa 28.16-20; Markkoc 16.14-18; Lukka
24.36-49)*

¹⁹ Ana ca'ri cen cipin noca'ri corokit noma'ri ime're'rapuruk, ul iammakothok wokat noppa noka'ran kulukku ana athat wunnukkwakotho kicce akka okin thonat n're noul woIouth. OIeccuo pummanthet kin ncik akwoco'rat itho'rküt then akwomiccat kin itti, "Ntharaththa?" ²⁰ Manakkka kwomiccot kin akwokenekat kin nyaun ana iunyit, aul iammakothok opirakat noka kannan akka okin thimmat Ili oIeccuo.

²¹ Aieccuo appomiccat kin akwi'rekat itti, "Ntharaththa? Ana ammakka ongappa pothiothin mpantappothiot non." ²² Manakka kwi'ret lon elli, akwokwat utha nakin, akw'rekat kin itti, "Nocco Kanang ikupupure." ²³ Amma onon thocikinthet opilingon lon ilokithak, laccikakot ana amma onon thakannocikinthet opilingon lon ilokithak ana lakannocikakot."

OIeccuo pumminthet oThthoma ncik

²⁴ Ana noca'ri cen, pul ipammakothok nti iul attul ana ikken ke'ra iponat k'ran itti oThthoma (ponat k'ran cakuruk itti Tharo) papellat noca'ri ica oIeccuo paat nan. ²⁵ Aul iammakothok w'rek i'rekathok itti, "Onin thimmat Ili oIeccuo."

AThthoma omekat kin itti, "Mpakorronno oc-cokot lon len nocikit aththik amma mpakin-nimma ka'ran konyuppa nonyaun nyung ana othonto ka'ran konyuppa mmaun min, ana oth-onto iunyit."

²⁶ Anakka ma'ri meot ncik me're'rapuruk, aul iammakothok appa'rntakat noppan tulukku attang ana ca'ri cen aThthoma pokat cik akin aththungon ana atthat wokat wunukkwakot kicce, aleccuo akkakat akwoco'rat itho'rküt then akwommiccat kin itti, "Ntharaththa?"

²⁷ Akwi'rekat oThthoma itti, "Onekkethe caun cene, antokatha nyaun nyin. Othie ukun athonto iunyit win. Kirrnni ona miküt me'ra ilon, oc-cokothe lon nocikit."

²⁸ AThthoma i'rekat itti, "Ili win ana Kapik kin."

²⁹ Aleccuo i'rekathok itti, "Ngkwoccokothe lon nocikit p'rin akka ngkwimmarini? Thopira noka thaka noul ioccokothe lon nomikit akin thakinnimma lon l'rek."

Lon latham enni

³⁰ OIeccuo pokkothe lon loppot ilommath-thik tokit koul iammakothok, ilakannokurrakot iatham enni. ³¹ Anaruk elli lokurrakot othakka itti anon occokot lon nomikit itti oIeccuo ook oMiccie ana ukul woKapik ana nthoccokot lon nomikit, onon thiot thikkoik thothupthuput ngk'ran kung.

21

Oleccuo ana lon ilommaththik lothoccicokot ape

¹ Manakka elli locothakothe aleccuo appummanthet ul iammakothok ncik attang nokuthut korok irapangka toCelil (iroccot k'ran cakuruk itti tok irapangka toThipiria). Kumminthet kin ncik ngkathar engki. ² Ana ca'ri ica kumminthet kin okin thaththokat tothun oCamaan oPoththuruc ana oThthoma iponat k'ran itti Tharo ana oNaththanail ponoka'ran koKana koCelil, ana nyukul nyoCepethi ana ul woIeccuo iammakothok w'rek we'ra. ³ ACcamaan oPoththuruc i'rekat kin itti, "Mpaik paeo iape." Akin i'rekathok itti, "Oron thaeo unnaththut." Akin oingkat akin arrat ikuppu'rung kono'i'ri, anaruk ca'ri cen ngko'ra okin thakorronno ocokat pap'rek aththik.

⁴ Ana nngi'rïmak aleccuo oco'rat nokuthut korok, aul iammakothok wakinninakat itti ook oIeccuo. ⁵ Akwakkarat kin akwomekat kin itti, "Paththon, nthella ape wottei?"

Akin omekat oIeccuo itti, "Papella."

⁶ Akwomekat kin itti, "Norret lo'rak lape thokkun wothothari wokuppu'rung kono'i'ri ana nthi'riththa ape." Manakka okin thorrethe lo'rak than, akin i'riththakat ape akin ommakat otho akka ape wokat woppot kannan.

⁷ Apul ipammakot oIeccuo ipa kwappongothe i'rekat oPoththuruc itti, "Katha Ili." Anakka oPoththuruc poccikothe lon itti, "Katha Ili" akwi'rikakat kret kung ikin akworpat i'ri (akka kwokat puetheik). ⁸ Aul immakothok w'rek

akkakat ngkuppuru'ng konoi'ri akin otho lo'rak aloppathe ape tit akka okin thaththakonnoka ciththan nokuthut korok. ⁹ Anakka okin thorpotheik nocapu akin immakat monyik mothik amonu ape nan ana arrakith.

¹⁰ Aieccuo omekat kin itti, "Nona ape wotte nape ianon thi'riththat."

¹¹ ACcamaan oPoththuruc arrat ikuppu'ng konoi'ri akwothat lo'rak lape tomarakan ana lonat ape tit ittittik arrial we're'rapuruk ana alkaire ana ikken k'rapuruk (153) ana lo'rak lape lakorronno ommottakat nape iokat tit woppot.

¹² Aieccuo i'rekat kin itti, "Nanthan annatho'rko thu'rit thorrot." Opilin pellakathe nti iul iammakothok ipipittot itti, "Oung oththa" akka okin thaththina itti ook Ili oIeccuo. ¹³ Aieccuo onekat arrakith akwekat kin, akwonekat ape cakuruk akwekat kin. ¹⁴ Ana noca'ri nci oIeccuo pothikkiet ma'ri m'rapuruk akwumminthet ul iammakothok ncik ammakka kurokot nti ithio.

Oieccuo perene oPoththuruc

¹⁵ Anakka okin tho'rkot cik, aIeccuo i'rekat oCcamaan oPoththuruc itti, "Camaan ukul woIuanna, ngkwongothin kannan nolon elli apiki?"

Akwothianthok tit itti, "Ii Ili win, ngkwinan itti mpongothung."

Aieccuo omekathok itti, "O'rkie lungkat lin cik kicce." ¹⁶ Akwappipittathok attang itti, "Camaan ukul woIuanna, ngkwongothini?"

Akwothianthok tit itti, "Ii Ili win, ngkwinan itti mpongothung."

AIeccuo i'rekathok itti, "Okatha lon lolangkat lin."

¹⁷ Ana kwothikkiekathe ma'ri m'rapuruk ak-wipittothok itti, "Camaan ukul woIuanna, ngk-wongothini?"

APoththuruc uakat ka akka oIeccuo pipit-tothok lon othikkie ma'ri m'rapuruk itti, "Ngk-wongothini?" Akwomekathok itti, "Ili win, ngk-wina lon appik ana ngkwina itti mpongonthung."

AIeccuo i'rekathok itti, "O'rkie lungkat lin cik. ¹⁸ Mpi'ret non lon ilaik icat itti ca'ri ica ngkwokat pu'rit, ngkwokat ako eret ngkarkkang ana aeo na ngkwongothe itti ngkwaeo. Anaruk amma ngkwothakkat thomocco, ngkwathie nyaun akin akieng eret ana okin onekothung na ngkw'rat eo." ¹⁹ OIeccuo pi'ret elli akwokene thio itha oPoththuruc athio ana itha akwethet Kapik thrik ngngin. Akwomekat oPoththuruc itti, "Omakothin."

²⁰ APoththuruc olliakat akwimmakat itti pul ipammakot oIeccuo ipa oIeccuo pappongothe paik pammakot kin nthoceken, ook ipothngkarakothe oIeccuo ca'ri icakin thokat akin o'rko thu'rit thocipin ana ipi'rethe oIeccuo itti, "Pul ipangkene, oththa akkaik pathokerong?" ²¹ Anakka oPoththuruc pimmarok akwi'rekat oIeccuo itti, "Ili win, ana lon loIuanna tat?"

²² AIeccuo othianthet oPoththuruc tit itti, "Amma oun akkongothe itti kwikkoik puccuk anakakat, ngkwi're taththa? Omakothin tul-luk." ²³ Alon opettakat cik itti pul ipammakot

oIeccuo empi pakinnio. Anaruk oIeccuo pakorronno omet oPoththuruc itti pakinnio anaruk kwomethok itti, “Amma oun akkongothe itti kwikkoik puccuk anokkaprttakat, ngkwontha oung?”

²⁴ Pul poIeccuo ipammakothok empi ipokat cik akka lon lokkattathe ana ook akkokurrot. Onin thina itti lon lung laik icat. ²⁵ Lon laik loppot ila oIeccuo pokkothe anaruk amma lalokurrakothe appik ana mpakathe ere capu ncik appik cella ka'ran cik na natham ikkoik inokurrakot.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.
All rights reserved.

2020-11-18

PDF generated using Haiola and XeLaTeX on 23 Aug 2023 from source
files dated 29 Jan 2022

b9cb69ce-3694-5d9f-bda5-4a2243fae